

增補文獻備考

三十九



增補文獻備考卷之一百九十三

弘文館 纂輯 校正

選舉考十

銓注二

補本朝 定宗二年大司憲權近啓曰名器人主之大寶不可紊也邇者除授之法不論實職或以添設典書陞爲檢校中樞或以檢校中樞超拜省宰甚不便願自今受實典書者乃陞檢校中樞受實中樞者乃陞省宰則差除有序矣從之

檢校卽權攝之名自唐宋已有其職我朝之有檢校助於此

補門下府上疏曰前朝官人必署經臺省者乃所以精選人才也今五品以下只令本府署出四品以上直授官教用人一也而告身歧



而二之恐非經久之典也臺省公論所在故凡謚誅口傳等事皆令糾察而除拜庶官豈皆使之不察乎願革官教之法告身令臺省署出司憲府言太上王當人心離合之際特用官教之法以待勲勞之士斯乃取便一時而非所以垂憲萬世也今當守成之運凡草創權宜之法在所當改上詢都評議使司令復行各品告身署經臺省之法

太宗十二年成石磷啓曰銓注之際召集臣等於前自九品以上皆親問賢否而除授則冒濫者無矣上曰委卿銓衡何必與卿等親執班簿哉

補許稠嘗以臺臣坐言事出補全州判官及吏曹正郎闕上閱官



案指稠名曰此人可當遂除之

補鄭道傳之死徒黨皆去金桂蘭獨不去南閭之逃僕從盡散崔沔

扶掖共匿 上義之招置麾下任以近侍桂蘭至三品沔至二品

十五年命庶孽子孫勿叙顯職因徐選言也

以權近兼大司成大司成之兼帶自此始

世宗朝元孫入學時特命大司成尹祥爲博士

後以文衡爲博士

補鄭麟趾常昵侍經幄眷注甚隆職在中樞特命歸政府議政時人

謂之內相

以右議政盧閑兼判兵曹大臣之兼帶兵判始此

後有柳成龍朴淳朴元宗金錫胄等

世祖二年以申叔舟爲右議政仍帶典文衡議政之兼文衡始此

補命吏曹罷冗官百餘員

補三年諭咸吉道觀察使咸禹治曰本道興王之地從仕者少可當東西班人訪問選揀其祖系職姓名具錄以啓

補罷兼判吏兵曹事

補五年吏曹啓請以數曆法取才叙用依醫書習讀例計任授官所業卓異者加資從之

以魚孝瞻爲吏判 上謂孝瞻曰銓選必無人情然後乃可予深許卿無私也

具致寬爲吏判前此長銓曹者於除授之際親執官案亞官以下袖手傍觀致寬思矯其弊凡進退人物博採群議雖小官卑職未嘗獨薦時



徐居正以叅議在政房適醉睡致寬厲聲曰叅議謂致寬注擬忤臆不欲與聞耶他日有用人之失叅議其曰在家不知耶

徐居正疏曰伏觀 聖上慎簡百僚尤重守令之選選必政府幹曹同薦有文理吏治者視品秩銓局而量授之遣必引內殿溫諄告諭勉以五事有十考皆居上者必超擢而用之內官無此例盖重之也鄭甲孫爲大司憲時吏曹誤舉人注官 上御思政殿受常叅河演爲兼判書崔俯爲判書俱入侍甲孫曰崔俯不足數河演稍知事理而非其人請罪之 上怡顏兩解之出外庭二公流汗飜漿甲孫莞然徐笑曰各盡厥職非敢相害也

韓繼禧爲吏判啓曰臣待罪銓衡常開閣迎士大夫品題人物尙恐

不能甄拔賢愚況今設循資之格嚴奔競之禁是使聾瞽辨聲色乞罷之上曰使繼卿者皆如卿則可非卿不可繼禧之注擬人物一出至公不以私貸或有爲親戚求官者不甚拒之曰古人云內舉不廢親苟以謂膏梁子弟稍存形跡非用人大體

以左議政申叔舟兼判禮曹

後以右贊成朴元亨兼判禮曹

以姜碩德爲大司成知禮曹事不由科第而爲大司成者只碩德一人而已

補六年 教曰漢光武以天下之大尙減損十置其一國小官多食浮

於事豈天祿之意遂汰冗官一百員

補七年掌令柳季藩言金師禹長兵曹而其妻弟李克培長吏曹不可



使政權摠于一家也 上曰臺臣自不察耳其熟思之

補曹仲瑣錄曰 世祖嘗不喜一卑官不欲遷職累數年一日內宴宰樞皆在殿上顧見其卑官亦已金帶矣 上心驚訝宴罷急令銓曹考履歷果自清班除擬而進也 上乃曰人之貴賤有命存焉亦非人主所能爲也銓曹除官必備三人擬進上或以濃筆蘸墨汁臨三人姓名之上隨其點落處下點或令不解字宮人點出曰是亦命也

補以李克堪爲刑曹判書 上召語之曰卿職帶書筵不可授以煩劇之任然刑獄重事非卿不可故特授之

補十年 上閱官案中四品以上可合承旨者諸臣每舉一人 上輒

科文科甲科第一人授從六品餘正七品乙科正八品階丙科正九品  
階元有階者甲科第一人加四階餘三階階窮者陞堂上官乙科加二  
階丙科加一階階窮者授准職已准職者陞堂上官其所加與應授階  
相等者不及者於應授階又加一階授階者分差成均館承文院校書  
館權知○武科依文科例除授分差別侍衛及訓練院權知○譯科一  
等授從七品二等從八品階三等從九品階陰陽科醫科律科一等并  
從八品二等正九品階三等從九品階授階者并差本衙門權知○除  
授沿邊守令兵曹同議除授○限品叙用文武官二品以上良妾子孫  
限正三品賤妾子孫限正五品六品以上良妾子孫限正四品賤妾子  
孫限正六品七品以下至無職人良妾子孫限正五品賤妾子孫及賤



人爲良者限正七品良妾子之賤妾子孫限正八品兵曹同○告身凡受職者告身五品以下考司憲府司諫院署經給之○憲府諫院有過改五十日未署經者啓○未受告身前行公物故或罷職者其告身已署經到本曹則給之

補失告身者告本曹  
考覈給立案兵曹同

○政案每三年京外官員具

錄出身來歷呈本曹錄于政案○解由凡除職者考解由兵曹同濟州牧使則否○老人職年八十以上勿論良賤除一階元有階者又加一階堂上官有旨乃授○相避京外官本宗大功以上親及女夫孫女夫姊妹夫外親總麻以上妻親父祖父兄弟姊妹夫並相避學官軍官則勿避議政府義禁府吏曹兵曹刑曹都摠府漢城府司憲府五衛將兼司僕將內禁衛將承文院掌隸院司諫院宗簿寺部將史官則并避本

宗三寸叔母姪女夫四寸姊妹夫外親四寸兄弟

聽訟同

吏兵房承旨及

吏兵曹官員有相避者勿除職滿仕者例遷兵曹都摠府堂上官兼司

僕將內禁衛將五衛將則雖非同衙門通爲相避○宗親府親盡則依

文武官子孫例入仕○議政府堂下官并用文官舍人有缺以檢詳不

計仕數陞差○敦寧府宗姓九寸異姓六寸以上親王妃同姓八寸異

姓五寸以上親世子嬪同姓六寸異姓三寸以上親已上寸內姑姊妹

姪女孫女夫除授

先王先  
后親同

大君女婿公主子初授從七品公主王子君

女婿翁主子從八品○義禁府堂上以他官兼○六曹吏禮兵堂下官

并用文官○承政院堂下官并用文官○經筵以他官兼○算員加階

從六品去官○弘文館并用文官提學他官兼○藝文館提學他官兼



奉敎一年兩都目二員去官○成均館并用文官同知事以上他官兼  
博士以下以司錄奉常直長兼次次遷轉兩都目三員去官○春秋館  
并用文官他官兼○承文院并用文官叅校以下他官兼博士以下奉  
常寺直長以下一員兼次次遷轉兩都目二員去官○奉常寺正以下  
并用文官○觀象監主簿以上並以出身者除授天文學習讀官從六  
品去官後守令取才入格者叙用禁漏從六品去官○典醫監主簿以  
上并以出身者除授○侍講院并用文官副賓客以上他官兼○宗學  
司成以下典籍以上兼○內需司加階從六品去官○外官職階及遷  
官加階行守並同京官○畿外諸陵殿叅奉觀察使擇本道人擬啓○  
教授收以上則文臣都護府則生員進士中擇差○年過六十五歲者

勿外叙

堂上官及未挈家者不在此限

親年七十歲以上者勿差三百里外遠邑守令

凡官職階高職卑降一階則爲行降二階則爲兼降三階則不得

仍帶

董越朝鮮賦云先世常兼文武官者謂之兩班止許讀書不習技

藝

成宗己丑以韓明澮兼判兵曹韓繼美兼判吏曹 大王大妃教曰

世祖特置諸曹兼判書大行欲自摠攬故除之今嗣王幼冲其置兼判書於是以二人分判吏兵曹

同年命各年武科出身閑散無所屬者隨品差習讀權知每日赴本院讀兵書習射本院堂上考察勤慢其有文武才兼備者錄名以報兵

曹及都摠府試才調用於東西班守令僉使萬戶從兵曹之啓也

圖吏曹官制條格 一署經之法考其除授議其賢否少有釁咎輒

不署經故士類請議耻於爲非 世祖罷署經之法臺省請議無所

施行今後朝士告身依舊署經○一賊吏永不叙用累及子孫以勵

士氣近來此法稍弛貪墨之徒無所懲艾依舊舉行庶孽勿許赴試

亦勿授顯官○一平壤永興府尹觀察使兼差○一門蔭子弟年過

二十試一經方許從仕比來此法廢弛不學童穉率多任官曠廢職

事續大典門蔭條功臣及二品以上子孫嫡弟姪京外官三品守令

子孫曾經臺諫政曹者之子年二十以上吏曹移文藝文館試一經

中格者給牌還報吏曹元大典門蔭條若祖父曾犯罪未經改正者



不許蔭授今後依大典施行○一守令授職後或憚路遠或憚邑殘規避者依六年不叙之法○一守令萬戶察訪不法一年二度遣行臺檢察○一外方教授或至十年不遞訓導必十五朔而遞故教授憾其沈滯訓導坐計日用皆不勤今後教授隨考滿即叙其五考二中者及訓導三考一中者並罷職

補奉保夫人白氏請爵人 上曰予以幼冲因內謁爵人則於國政何若復言者予必不貸白慚懼而退

元年 教曰近者守令之選頗輕率以閑散凡流補之民之愁歎實由於此今後須擇廉介有聞望者除授雖政府六曹郎官亦并注擬

左承旨蔡壽坐事當遷命降左副政院僉啓曰院中上下之間禮分甚

嚴寧遞不當降 上答曰如某不可不在喉舌卿等安知予意不數月超授都承旨

以許琛拜吏判特超一資以行吏判之任命下之日朝野相慶琛廉方公正有藻鑑掄選注擬咸適其才人莫敢干以私

補十四年選武臣四品以上有操行才藝可任大事者八人從文臣受讀史記

補教吏兵曹曰非係國家綱常之罪不可以一時微過廢棄終身近來人有一失銓曹指以爲瑕終不注擬雖或用之臺閣從而捃摭其於用人大體甚不便今後無蹈前轍

補十六年命再嫁女子孫勿齒東西班



大典續錄 官職禮賓寺軍資監提調以戶曹判書濟用監提調以戶

曹判書差任○文昭殿提調一員以戶曹堂上差任○奉命宰相正一

品則都體察使從一品則體察使正二品則都巡察使從二品則巡察

使三品則察理使隨品稱號○各道正二品以上觀察使京職兼差兩

界則否○二品以上文臣及雖非文臣曾經議政府六曹漢城府堂上

員特進官稱號每經筵二員入叅○各道觀察使以拜辭日始許遞節

度使同○羽林衛將三員從二品以他官兼○除授中外有闕處不得

已非時擬望則須會吏曹議啓○生員進士雖無保舉隨才注擬○平

安永安道土官告身該曹都封下送○兩界沿邊守令廣擇文臣可用

者或於長官或於佐官隨其職秩交差○前卿文臣師表可當人五員

揀擇學官稱號軍職除授成均館當仕教訓四學官員有故則亦分差  
○外方叅奉內非取才人員試才後京職除授○觀象監習讀官內年  
久算學精通人東班叙用兼差本司勿叙外職醫書習讀官及漢學習  
讀官亦同○迎曙道金郊道大同道察訪擇秩高勤儉人京職兼差○  
樂生樂工別例役使功勞依大典差等給別仕取才入格則并計授職  
○漢學講肄官雖未經守令依承文院例加階○藝文館成均館承文  
院校書館七品以下官呈辭者還叙時勿陞叙於本品擬望訓鍊院同  
○成均館司成以下典籍以上經明行修堪爲師表者毋過五員吏曹  
同禮曹成均館堂上擇差勿叙他官不計仕數以次遷轉雖未經守令  
許陞四品以上階○一年捕虎十口以上守令資窮准職者代加未准



職者於是職陞一等○承文院預差諸員三人影職除授窠闕數少則一人除授○畫員詣闕別畫時影職除授○再嫁子孫勿叙東班職○署經議政府吏兵曹司憲府司諫院掌隸院弘文館春秋館知製教宗簿寺侍講院各道都事守令職除授人員署經時并考妻四祖○久任各司久任人員其司提調該曹堂上一同磨鍊移文吏曹啓聞置簿○典醫監觀象監惠民署久任官并令取才隨其分數多少典醫監觀象監則判官以上惠民署則直長以上職陞降除授取才未入格者授叅奉○成均館祭器書冊所掌久任一員雖臺諫守令勿移差○祭享宗廟大祭獻官以議政府六曹漢城府堂上差定若皆有故則他宰相擇差○各祭獻官凡干雜故單子啓下吏曹後即送司憲府有故眞僞閱

實托故者科罪○四學官員不得已大祭執事外勿差他務○遞兒倭女眞二學取才之次各一人及仕多各一人西班牙七品以下陞降除授○觀象監祿官十七內天文學十一地理學二禁漏二命課學二

燕山時魚世謙以大提學陞右議政朝議以爲當今文章之士無出其

右遂令仍帶文衡

大臣之兼帶文衡前有申叔舟而兩館大提學兼帶則實始於此故後皆援此例

補中宗八年 上患政出多門士習陵夷欲御親政商確人物令該曹品題以充庶官收議宰樞宰樞謂如進退大臣當收衆議斷自聖心賤微之官何必親經聖慮乎

補九年 教曰教養人材爲國先務陵夷成習近日爲甚可合師表人員擇差久任專意責成史官傳掌記事所任不輕有才識人遴選差除



讀書堂人員當專意鍊業今後本司毋得啓請常任

補十年安塘判吏曹先是銓官注擬視托屬高下如公薦及有功當錄者沈而不舉塘慨然矯弊一斷以公關節不敢干請於用賢政事不拘資格士林屬望而肉食多忌云

補十一年承旨金安國筵白蔭吏冗雜之弊曰今之所取率皆庸劣無識自棄無行之徒遂授以職布在庶官乏人固無足恠而庶職之不理專由此也請略敏經濟之法每年正月或開場試取或依諸科例遣臺諫于本曹并出榜給牌入格者叙用則庶合於舊六典之意亦不戾於今大典之法而乳臭不學庸愚無識者不能濫仕矣

補又筵啓曰前者 上教忠厚者擇用辯給浮薄者黜廢是誠美意

但循默苟容庸劣殘下者有類忠厚盡言極諫敢於有爲者亦似浮薄毫釐之差謬以千里辨別之際苟少有差邪正逆置賢愚顛倒非小故也

**補上** 下教曰治國莫先於得人古云勞於求賢逸於任人人君察其大綱而已近觀百司懶不供職虛僞成風敦厚朴實者謂之庸流輕捷利口者謂之正類如是而尙敦厚變淪薄不亦難乎任銓衡者須察乎此純直者褒揚輕浮者貶抑

十二年以副提學李荇移拜大司成 教曰以副學爲大司成舊無是例但作人爲重故特授之

十三年特陞李荇嘉善拜大提學

嘉善大提學稱守大提學國初申穉辛碩祖雖亦陞嘉善爲大提學然是



時集賢大提學以他職兼與今異  
故堂上陞文衡皆援李荅之例

白仁傑爲藝文館檢閱故事政曹開政則藝文館一員詣政廳書其得失仁傑以眇然新進能復其廢執筆往惟謹政曹共憚之

李暉光曰每大政則翰林二員分詣政廳書其得失有宣醞則坐於正郎之右暉光爲史官時亦嘗預焉 祖宗朝立制之意有在而今不復見矣

又曰藝文應教必以將主文者兼之金貴榮盧守慎姜士弼李山海辛應時柳成龍許筠隨闕除授自許筠後常缺而不補壬辰後李好閔外絕無兼帶者重其選也

金安國以崇政再拜大司憲趙元紀以二品爲副提學

二品副  
學始此

補十四年以弘文館提學金淨兼藝文館提學兩館提學兼帶蓋極望

而將以儲擬文衡

二十七年洪彥弼三十九年申光漢明宗十二年洪遬並兼帶是後無聞

補一日夜對筵臣有啓曰方今欲致太平須擢相當代第一人校理李延慶進曰是謂趙光祖光祖誠賢矣然今之用人須踐歷多人望洽然後可授以大任光祖聞之馳見泣謝之

補上嘉鄭謨奇遵張玉等之才將欲不次擇用趙光祖言于上曰三

人者皆明白通敏他日可大用然謨年纔三十遵與玉皆未滿三十何必不循資格也古者四十強仕必待道明德立然後就任大抵老成人居上列則朝廷尊而萬事和爲國之道必重名器安璫亦以爲言上從之謨天資超邁文法西京遵金鏗玉潤學慕濂洛時人目爲雙璧



二十年沈光彥擢科未唱榜銓曹擬正言從士望也許磁爲吏判啓定  
初仕五人擬望之制且選居泮儒生年高行備者別署一簿量才注擬  
補大司憲孫仲暉等上疏爲銓曹者注擬任情薰蕕相雜智愚莫辨  
昔成宗命衣冠子弟不學無才列於庶任者悉令汰去生員進士  
通經史識時務者舉而用之願殿下取法焉

補金柱臣曰 中宗朝金麟孫由舍人拜齊浦僉使尋以大司諫召  
還金伯醇以司成拜麟山僉使居五考拜義州牧使沈思遜以直提  
學陞滿浦僉使可見朝廷用人不拘常格也

大典後續錄 官職魚川道銀溪道察訪依迎曙金郊大同道例擇差  
兼授西班牙職係關驛路事直啓○成均館學官校書館昭格署別提作

散文臣雖未經年擬差○軍器寺弓箭該掌僉正判官中一員及別坐  
擇知弓矢武臣差任○新及第元有職者階雖五六品未經六品實職  
者分館冒年試才教授及屬忠順衛忠贊衛者雖經六品實職亦分館  
年滿五十而有才行無一資者超授六品實職○除授軍職中擇勤幹  
者二員漢城府假郎廳稱號本府常仕監輸田稅考勤慢殿最○僉使  
萬戶廉謹卓異者觀察使節度使啓聞遞來時隨品擢用勸勵○各道  
驛丞並革罷察訪差遣○老職堂上加東西班實職四品已行人外不  
許除授○江界府使以堂上官差送○以封君授西班牙職者並封君下  
批○沿邊絜家守令於五品以下軍職隨闕兼差兩界僉節制使萬戶  
以內禁衛兼司僕兼差○各堡權管以兼司僕內禁衛訓練院權知及



前卿有武才人擇差二周年相遞褒貶居中者降授司勇居下者並本職改差○賤人爲良者之子限正八品○凡軍士實職從其都目應授階擬除且軍士及雜職人員加資下批未出告身以前資薦狀者出告身考準則依其資授應授階凡軍士告身諸道限一年兩界限三年受出過限者勿用○原從功臣及子孫勿以其蔭許屬忠順衛○破陣庫依正兵例仕滿一百二十加階良人正職正三品而止賤人雜職正六品而止○雜令錄事書吏仕他衙門者國家大事外毋得給別仕爲先叙用○凡在外人員除職者近道中道三十日遠道四十日內謝恩過限者啓達改差○守令於本邑有田十結或壯奴婢十口以上者遞差明宗三年洪彥弼爲左相領相尹仁鏡曰見廟堂先生案韓明漣遞領

相九年後還爲左相鄭光弼遞領相越十年更爲左相洪彥弼座目本在臣上請以彥弼陞領相 上曰不必讓也大司憲具壽聘啓以座目陞降未便命招六曹判書以上兩司長官議之皆以爲當從座目前例亦然遂命仁鏡降左相

五年洪應啓曰五鎮判官始以文官除授而今爲成法五鎮防禦甲兵之事固非儒者所能也今者例遣文臣故年少武臣不知五鎮之事此甚不可請自今五鎮內文臣三員則武臣二員武臣三員則文臣二員差授 上曰雖邊鎮不可專用武臣故以文臣試之爾

八年

補改七年

大司成缺大臣請以堂下官有文行者擇差乃以李滉擬差

**補**命弘文錄外文臣年四十以下能文之士別爲抄選每年四仲朔與

弘文錄人同入庭製述定爲恒規從鄭士龍之言也

補十五年命吏曹以遺逸成守琛曹植洪致堯李夢成尹希慶下勳男許樞等首先除職

補舊例惟直提學擬承旨而宗簿正以宗師輔德以春坊長並擬至是東壁兩司亞長因傳教並擬而宗簿正輔德之擬遂廢

補洪曇嘗爲兵曹判書大司憲趙士秀謂同僚曰洪是我之心友然才優於吏曹而不合於主兵蓋論之遂啓遞之卽往見曇曰茲事於君意何如曇曰我忝主兵決非所堪隱憂多矣顧君秉國論故恃而無憂時論兩美之



增補文獻備考卷之一百九十四

弘文館纂輯校正

選舉考 十一

銓注 三

宣祖五年

補當作六年

李珣請依

祖宗朝故事以未出身人通臺諫 上

議于大臣皆是其言允之

李珣請成渾以閑官兼經筵職

上以未出身難之金字顒曰未出身

者除官必從大典者指門蔭也若山林賢者則當以格外殊待也招之以賢者而待之以門蔭非用賢之道也

李暉光曰申光漢爲判中樞相臣沈連源尙震以申光漢立朝最

久年高有學而久在從一品請陞秩除領經筵於是特陞正一品  
今則時任議政外不得兼帶領經筵非舊例也

補八年特拜李後白爲咸鏡道觀察使 上親視銓注以咸鏡道民生  
失所以監司不得其人乃命遞觀察使朴大立時李後白因事免官家  
居特起爲觀察使以遣之

補上親政 教于吏曹曰勿用矯激之人務取淳厚之人金繼輝聞之  
曰此教是矣但人君偏主此意則柔佞者得淳厚之名剛直者受矯激  
之謗未必不爲聖治之疵類云

補特旨除金孝元慶興府使曰此人在朝使朝廷不靖當補邊吏吏曹  
判書鄭大年兵曹判書金貴榮等啓曰慶興乃極邊接近彼地非書生

所宜鎮守累啓乃命授富寧又特授沈義謙開城留守時沈金角立之說紛紜不已上意孝元自立黨自作不靖斥守絕塞義謙以先后至親故出之陪都尋因李珣陳白改授孝元三陟府使

十年以李後白爲吏判每除一官遍問當否若誤除不合人則輒終夜不眠曰我誤國事

補李後白爲銓長務崇公道不受請托雖親舊類徃候之則大以爲不韙一日有族人往見微示求官之意後白示以小冊子多記人姓名將以除官者也其族人姓名亦在錄中後白曰吾錄子名將以擬望今子有求官之意若求者得之則非公道也惜乎子若不言可以得官其人大慚而退



李珣疏曰古者爲官擇人久任以考其績今則爲人擇官不論才之當否惟以多歷清要爲榮故朝遷暮移一人盡經各司如是而求其不壞厥官者未之有也今若不改此謬規則治道無由成矣

李暉光曰在前凡官必計朔陞遷如銓曹郎官非滿三十朔則不得遷轉例也鄭錫堅自吏曹佐郎陞持平諫院啓以銓郎未箇滿而陞遷不可降爲刑曹佐郎 先王朝唐興府院君洪進由六品二十餘朔拜獻納猶以驟陞引嫌近來則朝除夕遷陞秩無漸矣又曰高麗時頒政有定式我朝則一年兩都目外隨闕隨差或至逐日爲政與古異矣聞中朝每月二十三日吏部會選其餘則惟大段除拜會推而已

十四年特命相臣柳成龍兼吏判成龍辭曰國朝以來未有此事萬一他日專擅之人以臣藉口則國家無窮之禍自臣始矣 上曰身居相位把弄朝柄者豈皆兼吏判而然

趙憲上疏曰臣竊惟東方人才之盛視中夏不滿二十分之一求其經邦論道者蓋難屢遇而當局思職者亦不多見矣政曹乃於主擬之際論不豫定坐于政廳然後執筆始議三望全合者無幾矣至於闕夥員乏之際則僅備一望餘皆苟充群情所以不厭公論所以喧騰也

補李山海爲吏曹判書謝病不出李珥往見勉以盡職報恩山海曰冢宰是一國重任我何以當之珥曰二品以上皆是闔茸充斥如公

幸拜此職甚愜士望公何強辭且公旣不能休官則惟吏曹合於公才如戶部刑曹非公才可辦近來政事溷濁願公勉出一洗舊染之習山海笑曰公何以知吾才乎及出視事不用請托門庭冷落如寒士珥聞之曰汝受爲政甚強人意可以救得世道矣汝受山海之字也士論翕然未幾以母喪去位金貴榮代之請謁之輩彈冠而起貴榮之門坌集如市時人歎惜之

李珥請親政曰親政則必用超遷久任之法明朝羅欽順請用此法而中朝不克從世宗用人以此法故其時庶績咸熙若使官爵朝更夕改百事不做矣

李珥秉銓三年以破朋黨恢公道革舊弊清仕路爲務如簡賢士以



充臺憲擇學行以爲師儒舉恬退以礪名節薦吏才以試臨民重監司之選嚴守令之薦皆一時所請施行者尤慎簡初仕及守宰西北人久不通顯珥以爲不可以地拘始通臺憲宋翼弼列書若干人以薦珥粘之窓間金長生往見而大驚請去之對曰此何妨泛論人才是伊川之所不辭也

大司憲有闕政廳以宰相多被戶曹推考可入望者只柳希春一人爲啓 上命單望注擬希春出肅以大司憲單望銓曹不以無前例回啓請堂郎罷職

柳希春久任副學後陞資憲 上曰希春可合副學雖無例除之

後金  
晦鄭

經世亦以資  
憲爲副學

以吏曹叅議金弘徵兵曹叅議許箴爲備局副提調

備局副提調始此

二十六年以李舜臣爲三道統制使時舜臣以全羅左水使連破倭兵累蒙進秩朝議以三道水軍不相統攝特授統制使以舜臣拜之

三十年明將楊經理鎬以運糧不繼欲遞戶判金晬請以平安監司韓應寅代之承旨許箴請從之鄭曄爭之曰官爵人主大柄不可以假人從之

都體察使李恒福筭曰沿海各官出身武士分番相遞往來海陣已編簿籍不容任意散漫行走其中或欲贏糧上京入仕本院冀遷轉之路者甚是窺閥平時武士爲兩界軍官者皆計仕本廳今依此規令三道主將凡身隸水師者除授由休番在家之日外計其應番

在家之日造冊列名轉報統制使本陣從事官一人專管計仕之事計日磨勘歲末移報本曹轉行本院置付計仕仕滿者一依本院員例以次遷轉則庶有興起之路矣

**補**鄭崑壽拜禮曹判書以爲階正一品職正二品以三公同秩降坐東西壁體面未穩引疾辭避自是爲式正一品之官例不授正二品之職

**補**尹斗壽曰奇大升常言朴淳嘗以拈出六品可當人若干徃稟

于三公皆以爲可最後來言其意吾以爲此乃末世好事銓曹之意如此誰敢有違恨公未能洞察 祖宗立法規模爲此過高之

舉必有後弊以慶延李成之行 成宗尙除叅奉久後出六品以

趙孝直

趙光祖字

學問

中宗朝亦除初入仕衆論歸一乃爲六品



祖宗朝不輕用人必有深意且無取才者不可用間有高蹈可用之人而寧失一二人不可廢法典云

補兵革之後武士由科第規仕宦者累千萬人軍吏以功當授職者簿不可勝按西銓仕途雜以多端前後居位者多以謗去丙午申欽拜兵曹判書視事數月清坐謝客不通關節而自能周知物情注措咸當人無不服

補光海初以內三廳叅下積滯不遷兵曹判書李廷龜請加設訓鍊主簿以廣陞遷

補金時讓曰光海朝金尙宮之母後夫劉夢玉其姪婿鄭夢弼尤貪縱用事吏議李挺元欲以夢弼擬襄陽政吏鄭愛男進曰襄陽

雖降爲縣其實府也夢弼是小人弟正男之子渠是白身安可擬此以傷國體吏曹本有相避之規小人方爲政色願用此例挺元大慚而止

仁祖元年以右副承旨洪瑞鳳差槐院副提調

槐院副提調始此

李暉光曰槐院提調必極選有文望之人在前爲承旨則減下近規有以承旨兼

補反正後首行親政金瑬賀曰親政始自世祖朝今殿下即祚之初舉而行之眞盛事也

補超拜儒生趙漫六品職先是漫抗疏諫廢母事被拷掠幾死竄配絕島故有是命

補書講筵臣李敬輿極言用人不公之失李植曰當今之病在於曲循相識人之意不問賢否一切注擬且所擬之人非有預定銓品或首擬或次擬皆無倫叙 殿下但於三望以首擬爲最賢而點下豈知三望元無高下之可言也 上曰三司清顯或見擬一人於副末一二番後更不注擬或初未知何許人而遽首擬殊不知其故近日儒生上疏以予首望落點爲有弊仍論 祖宗朝有上中下刻字筆當落點時信手取筆得上則點首中則點副下則點末此意似公鄭曄曰曾聞此 明廟時事也李植曰此非活法也李敬輿曰似有弊 上曰若三望中有曾所知其賢者則可以落點三望皆不知之人則此用筆之法似公也 補以李貴爲資憲吏曹叅判金槃爲嘉善吏曹叅議

此後亦有一人而不錄



補生員洪茂績在昏朝上明倫疏竄配巨濟海島將十年至是放釋直拜昌寧縣監辛巳特除司諫非文臣而除諫職者中葉以後今始創有焉後官叅贊

補獻納李敬輿言戚屬干政爲曩時痼弊當此建極之初宜戒撫仕之弊而日昨洪熹以戚屬除守令漸不可長上曰予亦悔之遂寢其命

補上嘗親臨行都目政吳允謙爲吏判以吳姓人首擬初仕上問此何許人對曰臣之族人奉臣先祀者而爲人亦可堪故首擬矣

上即落點于其人政畢賜酒允謙大醉進伏御床下垂淚上怪問之允謙曰國將亡是以泣上曰何也對曰臣初以私人首擬而旣面承下詢則臣不敢隱以實對而自上仍下恩點於其人是拘於

臣顏情而不以正道責臣也在下先失正道 君上從而失正道國  
不亡而何 上和顏而受之

補吳允謙在銓曹議于僚案曰庶官之稱職守宰之得人專在於選  
擇初仕使各薦知名之士錄成一冊臨政備擬而承傳恩澤之人類  
不得與仕路澄清時論翕然終不用承傳承嚴批遞

補二年 上以文武並用長久之道待武士不可薄諭以 祖宗朝厚  
撫之規通政以上有才局遠識者使之注擬於六卿及承旨通訓以下  
差擬寺正郎僚

補三年 教曰賢才之出豈有南北之殊降衷之天豈有擇地之理哉  
我國用人之道不廣西北人才絕不取用間有從仕者皆非緊要之任

此豈立賢無方之意哉况北方豐沛舊鄉西土中興根基亦豈無可用之才乎京洛子弟雖無才行朝除暮遷出宰百里遐荒俊傑縱有知識抱才虛老未免擊拆予竊痛歎其令該曹勿拘南北均用人才以示國家大公之道

上命招大臣二品以上于賓廳議庶孽許通事令廟堂酌定備邊司啓曰 太宗朝因給事中徐選之論有庶孽勿叙顯官之法未嘗全然禁錮及 成宗朝頒降大典時又有庶孽子孫勿許文武生進之法而曾孫亦無禁焉其後大典註解時添子子孫孫之語自此爲永世禁錮之人方當新化之日不可無疏通之舉大典限品叙用條良賤妾所生等級甚明盖良女未曾經人而爲妾者實與娼妾有間今宜就此斟酌



良出至孫賤出至曾孫并許通庶幾得中今後隨才授職俾無虛老之歎宜也從之

五年張維拜吏曹判書手寫杜請囑抑僥倖等事揭諸壁上而常目之與僚佐會議於公廳文武蔭多官之合於內外高下之任者使各聞見會坐錄諸一紙而安印臨政以備注擬用盡則又如之李景奭爲銓判亦依此行之

李暉光爲吏判嘗以疾不赴政僚宰擬典醫提調俾便醫藥暉光以備位銓長奈何自占便再䟽得遞○顯宗朝金壽恒爲吏判時亞銓擬除掌樂提調壽恒引暉光故例力辭終不免

七年汰戶工刑三曹郎官之冗雜苟充者命以文武極擇交差

補九年以李貴爲吏曹判書持平吳埴論啓天官冢宰爲任如何而人臣敢以私求人主敢以應求哉荅曰李貴之自薦殆無虛月若因其自薦而應求則爲相亦已久矣何待九年李貴上劄辭職執義金世濂繼發請罷不從

補十一年吏曹啓曰初仕生進外 祖宗朝設考蔭取才之法 宣祖朝又立銓曹郎薦之規癸亥初吳允謙爲銓長訪問京外學生有才行者抄錄啓下名曰幼學初選與生進蔭才相叅擬望今用之已盡請本曹堂郎更爲會同相議以備擬差從之

補十二年始定蔭官限年入仕之法以生進年三十學生年三十五以後許擬蔭仕且命銓曹擬望時區別文蔭武以啓

補十四年趙翼爲工判以其父瑩中時任繕工僉正爲工曹屬司辭遞工判

補崔鳴吉爲銓長屢歲鄭太和爲其姑母夫求邑屢以爲托鳴吉不應後又來請鳴吉曰某公欠剛明守令關民休戚公雖勤請不敢奉施太和乃止每以此舉似於人深歎其爲官擇人

補昔有一宰相判銓部有名同其先諱者不爲舉擬於官爵翼憲公鄭太和對一家人入銓地者以此事戒之曰銓者衡平之謂也人臣代天秉衡何敢以一己之私事尼公朝可任之人乎先輩名流已多有非之者後進之人不可不知也

補鄭載崙曰有尙方雕工慎姓人得幸昭顯於藩陽世子使人請



於兵判李時白欲除權管時白荅曰儲君不可以爵人私請於政官況權管邊將也邊將之職何可私於尙方之雕工乎

補又曰叅判尹墀海崇尉子也與其弟吏曹佐卽坵少擢文科登颺朝端大爲流輩所推仰而判書金時讓獨曰此非國家之福也禁鬻子弟醇朴少文蔭仕承家足矣而此子才望素著將必爲國家用後之居此地者不思才分之不及皆將以此爲期挾藉宮禁競相躁冒則誰能沮遏其勢耶判書金佐明 明聖王后伯父也朝廷倚以爲重而都正李楚老獨言此人之才雖在堯舜之時必不空老而後世處此地者皆以金公爲口實必欲一襲其跡則今日金公之效勞國家他日必爲壞損國體之首耳

補十五年 世子嬪兄姜文明以洗馬陪嬪宮入瀋陽銓曹欲充質子之數以其父碩期單望禮判啓下六卿單望差除前所未有也

補吏曹判書姜碩期啓曰七品以下官扈從人皆以承傳當出六品落後人則已爲罷職亂後新授之員仕滿之期尙遠奉事直長雖有窠闕將無以填差請依翊衛司叅下官陞遷例叅奉奉事及別檢不拘仕滿直以除授久近次次陞遷至直長而通計前仕滿四十五朔後陞六雖不可永爲後例似合一時便宜備局覆啓從之

十六年以右議政沈悅兼領度支大臣白 上曰竊聞 宣廟朝舊制如吏判雖使相臣兼之而實有判書云此時錢穀煩劇之務專委之相臣則體統有妨差出判書而相臣兼領則不違於前例無碍於事體矣

從之

崔鳴吉啓曰大典吏典六品以上官員仕滿九百日方許遷官 祖宗朝謹守此法六曹郎廳佐郎三十朔方陞五品正郎三十朔方陞四品故職事無曠廢之患仕者無驟進之嫌從之

又筭曰高山察訪驛在北路初面故例以六品以上文官爲之而不得可合者則往往以叅下文官有才者除授則西路兩驛亦何以異此臣意叅上如不得可合則間間以叅下有才者差遣亦無不可蓋陞遷則勸勵倍他年少則志氣銳而叅上則二年乃遞叅下則三年乃遷既有勤職之實又有久任之效如得其人所補必不少也

金尙憲疏曰臺閣之官時時補外使之諳練民事者是 祖宗朝已



行之規在 成廟朝多以侍從特除外縣未久又授內職此即漢時  
太守璽書徵拜之意也

補綾城府院君具宏坐事特命降資備局以方伯守令有罪降資固有  
前例而一品重臣事體未安陳啓答曰依律則其才可惜只贖則罪罰  
太輕故不得已降資矣不允

補二十年因開城留守金堦狀啓平安咸鏡兩道教養官文官叅下者  
滿三十朔則陞出六品事定奪

補二十五年備局啓禁府郎廳以六品差除雖出於一時權宜既違法  
例而今又以無祿之官反爲有祿之官則再變法典尤極未妥今後隨  
闕填差皆用差下遵依 祖宗朝舊例何如答曰厥數不多給祿可也

補孝宗己丑時兩司皆因事遞命待公除開政左議政李景奭言政者人主之大柄臺諫人主之耳目大柄不可以久拋耳目不可以久曠戊申國恤二十七日之前亦差出臺官請按例行之 上命更待數日

補下教于吏兵曹曰名賢忠臣孝子清白吏子孫首先收用以表章之臺諫關國家之治亂守令係百里之苦樂尤不可不慎擇始政之日剔去私情務從公道以副國人之望

補備邊司啓請令各邑守令擇境內有才行者勿論朝官儒生薦于監司監司察其可否上之吏曹吏曹試以身言書判進于政府政府抄其拔萃者啓下吏曹隨窠授職其才行超出者擢除叅上職武士亦薦于兵曹試武藝兵書隨才用之從之

二年吏判林潭夜對從容言銓選之難仍白曰 宣廟朝蔭官初授職必以生進或功臣忠臣清白扈從人子孫而御覽官案中錄其來歷矣至昏朝始廢此規故往往有濫冒者今宜復舊 上曰不亦善乎所謂望單子只一過眼而已若錄在官案可以常目在之矣

林潭爲吏判如有才行著聞者雖在寒遠必爲之甄拔調選常置一冊子別錄人姓名隨其才器擬望雖已在夾帙中如有屬托輒曰吾固欲用之君今有言此非公道不敢擬以故門無車馬之喧人比之李後白

李敬輿劄曰廟堂諸臣與銓部同議必擇曾經侍從愷悌才局之士擬議守令兼責養育人才期復湖嶺昔時之盛則必有愈於專取勢



力臨時苟充矣

補承旨宋國澤以所生父希命年滿八耄上疏乞優老恩批曰予豈惜此不慰喜懼之心哉仍命特陞通政拜僉樞後三年又有優老典國澤呈狀于該曹又特許陞嘉善拜同樞

五年洪命夏在亞銓以判書在外大政過限特命命夏開政初命夏爲銓郎獨持風裁以恢公道時稱得郎官體

七年初設兼把摠守令令其軍門自辟

特拜金集爲禮曹叅判吏曹奏以禮官之必用文官法也 上曰稽古讀書之人不可拘於常法也

補別設成均祭酒二員不拘資級以宋時烈宋浚吉除授遂爲儒林例

職

補顯宗五年置江邊教養官以教儒生從清北暗行御史閔維重之言也

補七年又設教養官於慶源會寧兩鎮以教北道儒生從咸鏡觀察使閔鼎重之言也

補九年諫院請遞吏曹判書金佐明啓曰戚畹秉政必有流弊故歷代帝王著令防禁者亦多有之至於竇廣國之忠而不以爲丞相馮野王之賢而不以爲御史大夫其防微遠嫌豈偶然哉金佐明身居戚畹遠授銓衡亦豈清朝之美事哉佐明累疏力辭不拜

補十五年備局啓曰內三廳必以禁軍擬望 孝宗朝初設此規實非

偶然而前後主兵之臣各以所見間或擅便致有多少弊端爲今之道莫如一依當初定式內三廳被薦之人入屬禁軍者必經一都試後始爲擬望則無意久任借人軍裝服色等弊自可祛矣以此分付施行何如從之

肅宗卽位初金壽恒啓曰新服之初恐未能的知某某之可合於承旨臣意則以一時才望擇備三望三司亞長不可廢則三望之外請依前加擬 上曰然則擬以三望尋仍舊制

補光城府院君金萬基例解本兼諸任而惟經筵籌司用西平府院君韓浚謙故事特命仍帶

補二年備忘記摠管巡將俱爲無實予欲罷之令廟堂稟處覆啓以爲



巡將監軍固爲閑漫之任而至於革罷事係變更舊章更當商確稟定矣

補右議政許穆上疏曰兵曹新設揀取武士之法無論有官無官凡被薦者招集列坐之視其容貌聽其言語取其可取者去其不可取者定爲令式此於得人之道可謂詳且盡矣而其弊必飾其言善其容以爲得官之蹊徑於事體有大不可者此與擊劔騎射試取不同凡有出衆之才人固未易知而外貌利口有足欺人中心愿慤者無所售於世而亦必有知耻而不求自試者爲朝廷羞大矣彼雖武人其官朝廷之爵固不可輕漫而苟授用人官人不宜如此

補兵曹判書金錫胄論事劄曰即今武弁甚多武職甚少旣無以收

羅才力又無以慰副意望而至於三廳將官之類纔罷旋屬禁旅之法抄薦已積調選尤難其勢將不得不有所變通今若加置武兼宣傳官叅內九窠叅外五窠則不過換得軍職十四司勇而可以無碍前頭設科差備導駕司禁亦可以備員矣

圖文臣叅下變通議曰承文成均兩館叅下自本館以次序陞者外承文院則有察訪五驛成均館則有三驛又有四學訓導各并七蹊矣今後則中間以蔭差遣之處悉皆還于兩館而四學亦無敢取舍冷煖陞仕如法則誠爲善矣抑又有矯弊於今日者當今士習渝敝利慾紛熾宰官士夫家之子弟年少才敏之類舉不以讀書志學爲念而先思仕宦之捷路如陵殿叅奉之類則又以階陞遲久厭薄不

爲稍有形勢輒以別檢都事爲掌握之物此蓋緣蔭祿之道廣速化之徑開也若於兩冰庫典設司別檢中除出三窠於禁府都事五窠中亦除出三窠令兩館叅下得以分差則已擢甲科之人庶可無滯爵之患而蔭路稍狹亦不害於愛才勸學之道矣

補五年復設兩南提督官先爲造給印信啓下事目以叅上叅下混同差送叅下則三十朔六品遷轉而座次則在於縣令之上與牧府使通關專管所屬各邑儒生巡歷考試觀其文行許赴科舉仍以提督爲錄名官一如京中四館之規未幾還寢

補六年筵臣崔錫鼎奏朴世采與政官相避不得擬望云單付成均館司業似當從之



補以朴信圭特陞刑曹判書領議政金壽恒筵白申翼相䟽中名器曰輕云者誠爲切當旣賜優批嘉獎朴信圭刑判特除又出此際下情不能無惑 上曰朴信圭曾爲承旨時見其衣服可知其清下直守令引見時以不爲善事之意言及則信圭以爲守令善事者固可禁斷而不受賂遺則可無此弊云故知其可用適有刑判之闕故擢用耳

補七年夜對賜諸臣酒饌侍讀官朴泰遜陳私懇乞外補養八十歲外祖母叅贊官李寅煥言法例父母外不得爲養乞郡榻前陳懇又格外請推考 上笑曰酒後異於常時勿推情事惻然特令依施

補八年兵曹判書金錫胄請依 先朝舊例令武士必經禁軍然後抄補內三廳從之

補同年右議政金錫胄啓曰 太宗朝金汝知爲都承旨三年擢拜兵判 先朝金壽興金始振徐必遠爲承旨實多贊決裨益之事請另擇承旨仍責久任上嘉納

補始令北評事兼六鎮教養官

補大司諫南九萬陳北路事情疏曰朝廷用人先門地而後實才其來已久矣北關之人沈淹不振旣非一二世則其先之無顯揚可稱固其勢然也以此雖或有名登仕籍見知於人者在文則不過三曹郎官在武則不過將官守門將而已古之聖王立賢無方未嘗以邇遐有間且或有以胡越爲一家者今乃無關嶺一帶之限畫定內外之辨使日月胚胎之地視同傖荒之域亦非大有乖於用人之方乎

曾在顯廟朝本道道臣間武士之不見錄於朝廷別爲啓請自本道選擇門地應爲內三廳之人取才上送道內武士頗有見收之望其後間或有除拜守門將者而及其陞出六品不過還除本道邊將而已因此反致失望者久矣厥後又並與其取才上送之規而罷之臣於辛亥年忝按本道備見本道人才之可用衆心之缺望常以爲慨然矣適其時連有搜訪人才之別教故輒採道內物議以儒武四五人應薦啓聞者至於數三度而一啓之後則事歸杳茫終未聞有一人之得錄其後聞有咸興武士韓浣上來京中其儕流中有欲薦於宣傳官廳者而本廳以關外人不許云臣在咸興時曾見韓浣身貌才技不後於人且其父及弟皆登文科歷職郎署若此類在於三



南等道則必先諸人得薦而只坐生長北路不得見齒於他人一韓  
浼見棄雖不足惜因使一道武士皆絕進取之望而國家磨礪之具  
反爲區別南北之資可勝歎哉

補正言金樞上疏曰銓法之弊其來已久一壞於格例之數變再壞  
於廟堂之侵權以一事之拘碍而輕改舊章以一人之私見而輒墮  
定制紛更無常澆風轉成倖門一開能否雜進此格例數變之弊也  
至於按簿注擬循例差遣之外如重鎮邊倖必令廟堂議薦而銓曹  
不得與焉況於進秩陞官之類乎國家置銓曹之官寄一代銓衡之  
權而乃不能除一重鎮之倖此則廟堂侵權之弊也故銓曹之所奉  
行者不過簿書流例之末而已則爲銓官者已失其職而又於其間

不恤人言叅錯私意循好惡而與奪視形勢而騰抑政目一出指點譁然又何望其恢張公道顯拔幽滯清仕路而重名器乎備擬之際問議大臣則銓曹猶得可否於其間而若其備望直拜之類則銓曹視若他事無所與知任以銓衡之意果如是乎將相之外大小除拜許令銓曹自擇而大臣特考察其當否而已則委任既專責望自重而爲銓官者亦可以知勉矣

十年以相臣金錫胄兼判兵曹事大臣金壽恒南九萬議曰 仁祖朝右相沈悅辭兼戶判筭云申叔舟之禮部朴淳之兵部柳成龍之吏部皆有實判書而大臣則兼領摠察而已人物進退典禮軍政本曹堂上往來詢問臣意則閑慢差除外重任緊窠皆令問議而擬差則其爲主

用舍之權無間於身叅政席矣從之

補十一年 教曰立賢無方乃古昔用人之道而我國則不然至於西北先加輕侮不許清選率土之濱莫非王臣用舍豈容若是懸殊其令吏曹抄出書啓以爲通清之地武士陞擢事亦令兵曹着實舉行

補十二年吏曹判書李敏叙啓曰侍從臣父年七十抄啓加資非法典所載逐歲視作故常實無意義且職在崇班者因其子之爲侍從一體加資亦極不當矣 上曰推恩之資當止於通政嘉善以上不當論

十三年 教曰國家治亂係於得人之賢否進退之權在於銓曹治平無事之時循常注擬猶當勉勵况今國事多艱之日乎必思所以祛私意恢公道褒節義崇德行舉廉吏䟽滯鬱以爲聳動振作之方考閱官



案隨窠擬入隨擬點下則一政官足矣何必親政爲哉

宋浚吉劄曰以從二品爲都承旨者陞正二品則不敢仍職蓋以官聯有序不得相攙越故也臣猥蒙恩渥已躋卿列今若仍據近密則是眞爲左右望之龍斷乞許遞批曰以正二品爲都承旨不無古規卿其勿辭

李敏叙判吏曹時疏曰本曹郎廳來言大臣出給小紙列書五人分付曰監役二窠吾將自辟以此擬望自辟元非法典所在或與銓官相議舉其可合者而已六七年來司僕軍器寺僉正判官以上許令自辟此則其時都提調啓請而後爲之古之大臣文章任東廳政事任西廳古之吏部尙書爲錄尙書署紙尾猶且不爲況於此事哉

尹趾完徐文重俱以將兵之官拜大司諫大臣奏以難便遞本職後仍以爲例

**補**十四年吏判柳尙運在外不出仕以大政過限命叅判尹趾善叅議朴泰遜行都目政而初入仕待判書出仕差出

**補**同年宋奎濂以都承旨除司宰提調都承旨雖兼吏批政格不以爲拘而奎濂上䟽曰承旨之分房兩銓同叅政席其意有在臣方泰爲該房則雖於其日病不得進叅揆以事理何可視同他人舉論於銓注間臣亦何敢以偶不叅坐爲諉冒沒承當乎雖未蒙許時議多之

**補**二十年領議政南九萬啓凡新入仕各司免新臣於癸亥待罪兵曹

時陳達定爲事曰禁斷矣頃在己巳初因大臣所達許令如前云凡干弊端乍禁還罷則其弊反甚於前伏聞日前兵曹判書尹趾善以半存半減爲請云凡事既知其不可則雖一切痛禁亦患有踰越之事而况半存半減何得革其弊乎不禁則已如欲禁之當以癸亥所定節目更爲啓下禁斷合當矣 上曰 孝廟朝別立事目後外方軍兵以此法連有梟示者矣軍兵犯禁人依初定事目通中外一體處斷可也

補癸亥事曰 京各司官員免新所謂罰禮許叅禮木納物分軸回刺官員下人等稱以新來付責酒肴雜物事及各司下人等稱以免新納物酒債種種徵責事依大明律官員受財不枉法條贓科斷自一貫以下杖六十至一百二十貫罪至杖一百流三千里下人等事



官員或不能致察或發覺後掩置則從重論罪 各軍門軍官將校書吏以下至諸色軍卒及外方上番軍中凡有免新禮木出歛民情酒食種種徵捧等事依 孝廟朝別立事曰捧置不發覺將領論以重律身犯者依軍律處斷出物者從重決棍 外方各道各官此弊尤甚凡鄉校鄉廳營吏驛吏衙前官屬之類犯禁者依各司官員下人等例論罪軍門軍官將校以下軍兵等犯罪依京軍門例處斷

補政院啓辭政官有故則次官有闕之代有令廟堂差出之例今亦依此例叅議有闕代令廟堂差出從之

補二十二年右議政尹趾善筵啓吏曹判書崔錫鼎筭中庶孽許三曹一欸此非錫鼎剏始之言乃錫鼎祖父之所曾奏達而行之者其時先

輩之論或以爲宜或以爲不便論議之不一古今何異庶孽之不通仕路乃我國之法古今所無者也先正臣李珣始創許通之法蓋爲庶孽通仕路之階梯而適於其時有北路軍兵事故有此捧米之規似非永以爲法之意也此非金石之典變通不難矣 上曰許通之規除去宜矣

初禮曹判書李袞疏略曰王者受命四境之內莫非王臣又何可論貴賤於卑匹之中門地閤閤簪纓之謂也簪纓之權在於誰手而有此遺本舉末之政乎大哉我 宣祖大王之教曰葵藿向日不擇傍枝人心願忠豈必正嫡今以庶孽可稱者言殷有三仁庶居其二齊之穰苴名顯天下東漢以來漸貴世胄而王符之賢著稱簡策晉

代衣冠每論江左人物輒以伯仁爲首伯仁卽周浚之妾絡秀之子  
顗也桓石處司空豁之賤孽而威名振動此外漢之衛青縣吏鄭季  
之娼產而位大將軍霍去病縣吏仲孺之賤產而位驃將軍晉裴秀  
尙書令潛之賤產而爲後進領袖位至司空陶侃卽丹之妾湛氏之  
子位極人臣阮孚咸之賤產其母鮮卑婢也而位吏部尙書曹志卽  
廢姓之庶子位至甄城公隋李圓通卒隸景之娼妾黑女之子也而  
位大將軍崔頤沂州司馬子元之庶孫而位太常卿唐蘇頲壞之婢  
妾子而爲名相封許國公孝子杜羔之母非正嫡而位工部尙書李  
愬晟之妾子而位右僕射霍國公杜荀鶴牧之之娼妾子而位吏部  
尙書宋朱壽昌京兆尹奕之妾子而位至大夫韓琦范仲淹俱稱母



賤而爲宋名相陳瓘之父與潘良貴之父榮情密陳惜潘無子借其生子之婢生良貴後其母往來兩子家人謂一母生二名儒胡寅文定之庶子爲大儒崔道固官顯之後奉使青州其諸兄逼道固母致酒客前道固驚起曰家無人力老親劬勞諸客咸拜其母母謂道固曰我賤不足起貴客汝宜答拜諸客歎美其母子而賤其兄師友之間不以此有降也人曰庶孽外家不正故善少而惡多若然則微子之後孟孫之裔皆不足以尊崇乎先儒有言曰人之精神心術不用於正則用於邪凡今庶孽不齒群類作一罪人脅肩諂笑奴顏婢膝以免辱而取憐世業散失無暇自養狷狹慷慨之輩或悲歌遯世撫劍嘯吹豪逸之氣寓於市肆狗屠之間其中才以下貧不資生失其

常性皆入於牟利之中如是而責善人之不多是拉人糞坑而唾其穢也或諉以 祖宗舊制二百年永錮者至 宣廟朝而許通矣又至 仁祖朝而許三曹矣此亦可非耶易曰窮則變變則通窮則極矣此正變通之時也

補至是崔錫鼎疏曰庶孽防塞本非古制創自本朝中葉以前右代言徐選倡之贊成姜希孟繼之而百餘年禁錮成俗 宣廟朝先正臣李珥始發納米許通之論自是許赴文武科而清要諸職格而不許 仁祖朝因臣祖父鳴吉筭進定爲事曰登科後許要而不許清臣祖秉銓後因事曰三數人注擬三曹郎官爾後不行今又過六十年矣中國及前朝所無之法我朝獨行之如宋翼弼之學術爲世大

儒而終於布衣近世辛喜季之文章禹殷錫柳時蕃之才諳俱局於末官下邑而止可勝惜哉

補李灝曰防限之法始於徐選甚於姜希孟安瑋纂次大典之時至宣祖初年申濡等一千六百餘人上章籲冤批旨有葵藿

傍枝之語栗谷

李珣號

因邊憂行納粟許通之規登料後例授奉常

寺校書館三四窠而已至仁祖朝玉堂長官崔鳴吉以下沈之

源金南重李省身李景容應旨論列吏曹判書金尙容回啓命議

大臣時相臣李元翼尹昉吳允謙收議皆無異辭方許要而不許

清要者卽戶刑工三曹郎及各司官也叅判金壽弘亦䟽請竟不

行至肅宗乙亥嶺南人南極井等九百八十八人又上章籲冤



爲喉司所阻明年丙子吏曹判書崔錫鼎䟽論許要之後不過三  
四人注擬因以不行

二十九年正言俞命一請間以文臣有聲望者差遣關西邊邑以憚壓  
之上曰治不治惟在其人賢否之如何後廟堂覆啓以間差定式

崔錫鼎䟽曰臣謹按經國大典設官分職十考十上者陞叙十考二  
中於無祿官叙用制法之意此亦可見近來文官堂下作散一百八  
十餘員蔭官作散叅上四百二十餘員叅下三百餘員武官堂下作  
散九百餘員前啣甚多而官職有限銓曹知其如此亦無奈何臣詳  
考舊近官制東班堂下官減省一百二十餘員而初仕之增設亦至  
一百數十餘員叅上之失祿稱寃其勢固然至於叅下官則教官監

役別檢都事及雜歧直出六品外直長二十二員察訪八員奉事二十六員叅奉七十一員察訪奉事皆由直長而陞出其窠猶窄自叅奉而陞奉事則以二十六員之窠當七十餘員之來其路甚狹叅下計仕之規則察訪以三十朔爲限直長奉事叅奉皆以十五朔爲限而其中陵官三十朔方得十五朔之仕蓋因齋郎二員遞直之故倍其月數也奉事窠窄而叅奉積滯准朔之後恒過十餘朔而始遷今丙子夏季都目叅奉之准朔未遷者近二十人其寃甚矣生進年三十始仕學生年四十始仕而可用之人未必趁即入官例多四五十後窠仕積仕七八年始出六品雖有才能率歸於老而無用良可惜也爲今之計者莫加減叅下之員而增叅上減叅奉之數而增奉事

直長又減齋郎之朔數同於京官然後積弊可少掇矣減叅下而增叅上雖未可輕議叅奉之數不可不量宜變通宜將世室及五廟陵官二員中一員換作七八品而五廟陵官八員作直長世室陵官十員作奉事則直長凡三十員奉事三十六員叅奉五十三員節次陞遷之際不至如近日之窒碍察訪八員不必由直長而陞出依前日別檢變通例在驛加仕十五朔而直陞六品則郵官有久職之效直長無窳窄之患矣齋郎朔數之變改雖涉重難以理推之則京官亦有多官遞直而無倍朔計仕之事獨於陵官以兩員遞直之故倍其數而計准朔事涉不均今若減其仕日爲十五朔則有疏滯之美而旣同京官亦無倖捷之誚矣



補吏曹叅判趙泰采筵啓向者臺臣以監察必以生進出入三曹人員擇差事陳䟽大意則固好而蔭官必經詞訟衙門及監察後可以次補守宰若一如臺臣之言則一蔭遷轉之路甚爲苟簡今雖依定式施行而其法太拘終難永久遵行臣待罪銓曹時欲爲陳達變通而續續變改亦有所未安故未果矣今者本曹判書臣洪受瀍以此陳䟽有令廟堂稟處之命而大臣今方入侍下詢而處之何如右議政申琬曰若一如臺臣之言必以可堪三曹人擬差其路甚狹有不可行矣三曹郎官必以生進擬差故每患苟簡三曹尙如此監察必以此備擬則其路甚窄實無推移填差之路矣只當無論生進與否擇差宜矣 上曰只以蔭官之可堪三曹人員擬差則其路甚狹有難遵行文南武中各別擇

增補文獻卷之四  
卷一百九十四  
差可也

三十二年備邊司啓曰卽今文官四館叅外殆近一百二十人若令循次例遷則前頭積滯之弊有不勝言在前栗峰連原自如金泉濟原五驛爲承文叅下之窠昌樂槲樹保安三驛爲成均叅下之窠而頃年皆作文蔭叅上待四館積滯更爲復舊事定式矣今當還作文叅外上允之

三十四年吏曹判書李寅燁筵啓今當大政必以在官者次次遷除叅下官陞六者可以區處而拘於新制不得遷動久任則決無推移之勢守令擇差爲今日急務此後大政則勿拘久任何如上曰定式未久常時則不爲擬望大政則擇差可也

補閱鎮遠曰我國專尚門閥而偏於黨論故苟其名閥而言議合於時則登第之初即通清望一通清望內而極選要務外而重藩劇邑無處不可位躋卿宰則六卿之長無不遍歷夫人才各有長短苟非通才偉器豈有每官盡善之理乎至於兩銓則主於進退人材而大臣以下各以其親舊紛紜請囑銓官或不謹則大臣憑藉事體而責之卿宰以下諸親友亦皆以怒氣相加故內外官每有一窠則銓官視其請囑之輕重而擬望何暇念及擇人而搜訪人才乎既以奉行請囑爲事則自己之親戚故舊又豈不循私而用之乎以故仕路之混淆莫今日若也



增補文獻備考卷之一百九十四

增補文獻備考卷之一百九十五

弘文館 纂輯 校正

選舉考 十二

銓注 四

景宗二年李台佐啓曰西北守令多以武弁差送故邊民思得文官昔  
先正臣李珣亦以間差文臣憚壓隣邑之意疏陳於 宣廟朝故判書  
李植當 仁廟朝亦有乘障自效之請誠爲今日年少文臣所可法者  
請以三司出入人間差 上從之

三年以文蔭叅上窠窄察訪槐院二窠國子二窠陞爲六品以文蔭叅  
上差送

補英祖甲辰李光佐

時右議政

筵啓曰王妃父母封爵重矣雖公除前未爲

不可而有姑待開政之教亦太遲請於枚卜時封贈 上曰歷考前史

有以某爲司徒某爲司空亦可以觀其治也國舅封爵并舉於枚卜非

足爲後人觀也差有先後庸何傷乎

三年 教曰聞北評事所達邊民皆願一見文倅此後江邊及六鎮守

令文武交遞

補五年禮曹叅判宋寅明奏曰咸鏡道八陵叅奉以本道生進差出而

仕滿則遞甚可矜若以濬源殿叅奉一窠作八陵陞遷階使本道擇差

陵官滿三十朔報仕吏曹陞濬源殿叅奉以開北人蔭仕之路 上允

之仍命不能任職者道臣論罪



補六年 教曰天之雨露不擇地而降焉王者奉三無私施惠於民如天之施雨露無遠近之別今三百六十州道臣承流宣化守令分憂百里慎擇之道其可不審近來絕塞瘴癘之地必送武弁無勢力之人彼荒裔之民莫非吾之赤子未嘗得一良吏獲霑王化非所以一視之道也前頭都政予當以官案照檢若有如前擇地任人之弊則吏判當罪之矣

補七年命戶刑曹禁府隸院郎監察等官六朔前無得移差至於陞差啓請邑必懸註而三朔前毋得舉論

補因江原監司李普赫狀請空名帖 教曰世豈有納粟司直納粟護軍乎此後則僧俗通政折衝等帖外軍職及察訪贈職等帖一切定式

勿許事分付可也

補十二年始定兩南監司問議大臣差出之規

十七年命罷銓郎通清之規

教曰紀綱在上則治權柄在下則亂隨時損益忠質猶然其於節目間事物極則通理之常也弊極則革事之宜也吏兵郎極選而祛其兵選革其郎薦盛意可以仰揣然而郎薦雖革通清之權猶在此名雖革而弊猶在也此非翰薦之比非國初古制循微郎行私意之門亂我朝垂公正之法欲隨舊典而因弊釐革吏郎通清爲先革之其節曰大臣冢宰博考故事稟旨以處

補右尹鄭羽良筵啓近來銓官率多循顏面請囑遐方無勢之人一斥

不復旣非先王立賢無方之義使八方之人皆懷怨恨不平之意明神宗時張居正陳疏請以九州通籍之人各其名下書某省某州之人有才有能者勿論京外即加調用而其取舍一覽則可知云今若依此例凡八道之人勿論文蔭通籍入仕者及前啣并於名下書某道某州居人作一帖子置之御榻其中可合清望者則通清可合守令者則任以字牧時與大臣及銓官入侍時咨詢能否且驗銓曹用舍而董飭則庶有拔淹滯收才賢之效 上曰所達好矣依明朝故事作帖以入以此申飭銓曹錄用可也

補兵曹判書鄭錫五筵啓宣傳官武兼則二十四朔部將則三十朔中間變爲二十朔矣領義政金在魯曰故例守門將則十五朔部將則三



十朔陞六而部將每以勞過守門將而朔數倍之稱冤不已其言誠然矣臣在本兵時陳達依軍門將官例變爲二十朔守門將部將朔數皆少故每都政出六者甚多窠闕每患苟簡矣錫五曰雖有苦歇而叅下朔數一體爲之似好矣在魯曰守門將朔數與實注書同而宣傳官則歇役也與同朔數則必有稱冤臣意守門將則定以二十朔部將則依宣傳官定以二十四朔可矣 上曰廟堂相議考舊典更達可也

補十八年正月命朝臣年九十者無論文蔭武并加資

十九年命以曾經侍從擬差吏曹郎

補正月命朝臣婦人年九十者特許封爵

續大典 京官職大夫階東班嘉靖改以嘉義宗班昭德改以綏德正

義改以昭義儀賓光德改以靖德崇德改以明德○宰相以軍務奉命

者隨品稱號

議政府都體察使一品以下則都巡  
察使從二品則巡察使三品則察理使

○議政未拜相前

兼大提學者仍帶○大提學圈點時無前任則曾經文衡議政處遣史

官受薦○曾經大提學人雖爲提學毋得辭遞○副提學差出時雖時

任銓官啓請備擬○玉堂南床乏望則單付○副提學都承旨前已兼

帶同經筵者有妨坐次同經筵減下○經筵特進官以文蔭武二品以

上抄啓玉堂長官主抄啓非曾經政府六曹漢城府堂上則勿抄○武

臣擇其有才局遠識者堂上以上注擬正亞卿判尹左右尹承旨通訓

以下交差寺正曹郎非長官則無得擅擬○蔭官堂上以上諸曹佐貳

及左右尹判決事堂下寺正倣通清例備員通擬○吏曹郎官以曾經

三司通融差出革其主張通清之弊假郎廳母得啓下○翰林圈點一  
依弘文錄例叅外人員按榜謄出而時任翰林及曾經人員齊會圈點  
取次點以上若僭圈則大臣及館閣堂上更爲會圈倣宋朝館職召試  
例領監事館閣春秋館堂上玉堂人員叅考科次取三下以上被選人  
從試等次第付職圈中在喪罷職人員追後召試焚香回薦應講等舊  
規一切革罷○四館叅外勿論免新先後計其實仕陞遷雖在右位不  
爲來仕者母得付職○文科未分館前勿通說書○宗代未盡之前元  
無嫡庶之異其子孫文科弘錄武科宣薦勿爲枳礙○宦侍及醫譯母  
得授輔國資○外官職正二品以上觀察使京職兼差兼府兼牧處則  
否○凡瓜限觀察使都事以拜辭日始計

節度使虞  
候營將同

守令察訪以到任



日始計

邊將同

觀察使二周年計限京畿一年觀察使拿來代限十五日

身故代限十日辭朝過限者論責節度使邊守同○觀察使非有拿命

及臺啓則雖在罪罷依例封啓都事無得代行○各道觀察使關係公

事則雖他道守令狀罷○掌試時諸道都事勿以道內人差送○曾經

觀察使節度使者無得爲其道守令

南北左右兵使  
換道則勿拘

○邊地沿海邑守

令以文武交差○邊守陞資者十朔前圖遞則收資雖未滿十朔身死

則勿收資○邊守陞資時長官則直爲擬差次堂則問議廟堂○都事

守令之厭避殘薄規免不赴者赴任後厭避圖遞者各其地限三年定

配○海西關東兼營將守令以堂上差出○兼營將城將獨鎮邑守令

及沿邊沿海不率眷守令面看交代雖罷職拿問仍授本兼印符勿出

兼官○支勅時守令以私義當避者勿遞令兼官代察○善治守令准職承傳者若在五六品則先除四品後除授准職○守令移擬時懸註朔數年滿者毋得移擬○文蔭武年滿七十者勿差察訪○諸科重試人加階依大典文科元有階者例參外雖乙科以下并陞六品○新及第年滿五十者分屬三館後陞六品○功臣嫡長上護軍登科者參外陞六品參上加資○除授大院君奉祀人三代後初授敦寧都正同敦寧以上隨資例授

大王私親奉祀人初授敦寧正貂帽紅帶一依堂下終身例敦寧都正敦寧正并加設當世襲而年幼

則一依宗臣初封例待年乃授

○世子嬪之父初付職後卽授六品官大君王子夫人

之父授九品職○正卿則毋得口傳差出○兩南觀察使差出時問議

廟堂○名官之以善治善賑當陞嘉善階者通議廟堂後覆啓○資窮

而未經准職者勿許陞堂上○生員進士雖無保舉隨才注擬○代加者以通德爲限○臺官之直亞長蔭路之直郡守毋得差除武臣之直兵使同○從享先賢功臣儒賢戰亡冤死清白吏嫡長孫外毋得冒擬初仕父在則其子毋得以嫡長論○三醫司三品官之子孫勿許承蔭○外官之移擬他職者道里遙遠官事緊急則啓稟除朝辭赴任餘勿輕許○凡在外除職者近道三十日遠道四十日內謝恩過限者啓達改差○宗廟署社稷署各陵宗簿寺司饗院漢城府五部叅外官中庶當次則陞遷後以他司還差尙瑞院則換差備擬○開城府教官還作教授用自辟差送○吏文天文學教授之類勿論生進幼學年三十以上擬差

能歷  
兒同

臚唱引儀年二十以上擬差○雲臺官勤苦特甚者東西



銓揀拔調用○前朝王氏子孫各別訪問收用○嶺南北關西關松都人望單子懸註○六品以上陞叙則越品後無得通用叅外官陞叙則限六品通用○署經各道都事守令初除者階雖四品以上並署經會經侍從及堂上官則並勿署經

補凡署經時並考妻四祖

○五品以下臺官署經則

兩司備三員

三員或不備則雖至各二員啓稟仍行而必兩司一時齊會後乃署

舉行

兩司雖未齊會一司備員則先行監

察階雖四品以上亦署與都事守令同

監察署經先行於本廳無碍許出後署經兩司

監察

時已署經則雖初除都事守令者更勿署經

監察都事守令署經則兩司備二員○凡署經

人員初次見越則再署再次見越則三署三署見越則遞○凡告身公故外過五十日未署出者啓改○凡謚號受點後兩司署經○祿牌禁推人員未照律前毋得受祿且勿舉擬○差定親臨視學時侍講官經

筵領事知事同知事及成均館知事同知事中無故人員盡數書入講

書官則以玉堂及曾經翰林并七員抄啓○節使迎慰之任母得宗班

差定○秋曹及厨院郎廳大祭外勿差祭官○長寧殿獻官以江華留

守差定

通津府使預差

莊陵獻官以寧越府使差定

原州牧使預差

○齊厚陵穆清殿

祭執事以開城經歷差送有故則移差傍近守令○各陵殿叅奉假官

以付祿忠義差送若無忠義則曾經守墓官人差出齊陵厚陵英陵寧

陵各本官所在忠義差送○老人職宗班副守以上年八十封君之父

年七十者歲首加資○待從臣父闔帥父年七十者每於歲初吏兵曹

抄啓加資而嘉善以上母得變品超資法當推恩者雖以立春後年甲

行世一從生年加資新有應推恩人雖非歲首亦稟行○待從臣所後

父已資窮則許其推恩生父

承重孫之於祖亦同

○東西班曾經四品實職以上

人員年八十者令該曹歲首加資○士族婦女年九十者令該曹抄啓

封爵而其夫則母得因妻贈職○士庶百歲人加資許其子孫上言京

則漢城府外則觀察使歲首訪問以啓○相避出繼者於本生親一體

相避○婚姻家并相避○兩司官員勿爲通避一司應避者下位當避

右位則否○臺官與兼臺書狀與使臣并相避○觀察使節度使守令

僉使萬戶並交代相避○三南水軍節度使與統制使畿邑兼營將守

令與守禦使摠戎使北評使與咸鏡道觀察使有戰船舟師邑守令與

水軍節度使該鎮屬邑守令與營相避○京畿觀察使例兼兩都留守

留守與觀察使相避則留守遞改兩都經歷亦與觀察使相避○未赴



任都事與守令相避則都事遞改邊將與未赴任兵水虞候相避則虞候遞改○書狀官雖與銓官相避兼臺例付勿拘○宣惠廳提調郎廳并相避○各司例兼提調雖與都提調提調有相避勿遞宣惠廳提調戶曹判書例兼而與他提調勿避郎廳亦於例兼提調勿避○內三廳五衛將無兵曹句管之事判書外他堂上勿避內禁衛羽林衛忠翊衛忠壯衛亦與摠管勿避○咸鏡道南北關及兩南左右道守令於節度使換道則勿避南關守令於北評事亦同○叅外官凡有相避者則換差他司通計前仕外方叅外相避同○雜令 守令之限年禁錮者該曹待限滿懸註名下書入○承旨勿以外任并擬○注書隨薦次自本院望定移送吏曹差出而若乏三望則勿拘二望或單付○注書有故

則假注書差出○承文院叅外官六月都目二員十二月一員陞六品  
吏文學官三員并以蔭差仕滿四十五朔遷轉○贊善進善以有學行  
士望者擬差或單付諮議用別薦而無可合人則問議廟堂勿拘幼學  
差出○備邊司郎廳武叅外仕滿十五朔陞六品○義禁府都事叅外  
仕滿九百日陞六品○通禮院假引儀從除授次第不計仕陞兼引儀  
仕滿三十朔陞六品○繕工監假監役從除授次第不計仕陞實官通  
計假官仕滿九百日陞六品○觀象監兼教授仕滿四十五朔遷轉○  
德陵以下八陵並以北道人差出仕滿三十朔濬源殿叅奉陞差○慶  
基殿則仕滿三百六十日京叅奉相換濬源殿仕滿九百日京叅奉陞  
差○內侍童蒙教官並受司果以下遞兒祿仕滿九百日陞六品○議

政兼兵曹判書則雖不叅政重任緊窠問議○以封君授西班牙職者並封君下批○議政遞職送西領事判事員數雖已滿皆付判事○知事同知僉知事等窠醫譯以承傳見差者限三十朔遞○同知僉知事以老職陞資而除授者限三朔○節度使以曾經邊地守令及防禦使者通擬○陞資拜營將者瓜滿前以不職遞罷勿計朔數多少還收資級補以他罪見罷則否十朔前則雖病遞收資○營將十五朔以前毋得遷轉○邊地僉使周年內勿擬他職○江界三水甲山邊將以宣薦人差除待準朔陞遷京職

補續大典○承文院上博士有實故則次官分館寫字官四十人以本業人差○司譯員主簿以上并以本學出身者除授○兵典大典兼司



僕內禁衛衙門令合禁軍廳○訓練院正曾經內外三品後通擬叅外  
官用其次第分屬軍器寺由叅奉副奉事奉事直長而陞六品又由叅  
軍陞直長兩都目每一人去官權知病滿三十日及呈辭過限者實合  
除授時越一次過一年者越二次過二年以上者越三次主簿一窠各  
軍門哨官宣薦陞六品者擬差○宣傳官親功臣子除取才叅外二窠  
武臣兼叅外一窠每都目禁軍中薦取才者擬差叅外並仕滿七百二  
十日陞六品○守門將五窠以中庶許通叅外仕滿四百五十日陞六  
品○軍門諸將校差下勿拘貶下及罷職人知穀官以下久勤四十五  
朔內勿許遷轉積仕人出身赴防後復入該軍門者通計前仕教練官  
旗牌官勿論出身前銜閑良行伍射講陣三技並試選取而禁軍行伍

額中雖有出身勿計於出身窠闕○訓練都監把摠以堂下三品擇差  
每都目兩銓遷轉哨官知穀官旗牌官仕滿六百日陞六品他軍門哨  
官知穀官旗牌官並同○御營廳駕前別抄武士依駕後禁軍例久勤  
調用○扈衛廳所任軍官各三人仕滿二十朔陞六品四十五朔久勤  
每都目通三廳首久勤一人遷轉○禁軍廳宣傳官取才出身四十員  
部將取才出身十五員抄屬禁軍雖陞至嘉善仍屬不遞○捕盜廳大  
將兼帶摠管則遞摠管軍官久勤遷轉○別軍職廳每都目久勤兩銓  
各一人遷轉經閫帥則減下○內司僕寺內乘三員二員自從二品至  
九品通兼一員司僕寺正例兼叅外仕滿六百日陞六品○能麼兒廳  
郎廳叅外仕滿一千三百五十日考講陞六品○四山監役官仕滿九

百日陞六品○禁軍加資及實職兼司僕仕外他衙門仕並勿通用○  
邊將邊帥父母七十五歲者許遞獨子無兄弟則七十歲爲限

補二十二年備局啓曰北道之人除職者因道路絕遠或有除拜不知  
而已過三十日見遞者續大典在外除職者近道三十日遠道四十日  
爲限則固已念及於遠道之勢難趁限而如咸鏡北道及南道之三甲  
四十日之限實亦有未及之慮並以五十日改限至於六鎮則北道中  
尤爲絕遠以六十日寬定其限似爲得宜以此定式施行何如從之

補二十四年 傳曰王者用人京外奚間況奉三無私而御國兩雪不  
擇而下其所用人豈若是其偏乎哉噫苦心調劑欲得人才而然矣而  
若此之故收拾遐方亦不暇顧噫目今上下其欲奮勵而其先務得人



才爲先內以得人才然後國事可做外以任人才然後元元可濟昔則名公巨卿出於鄉者多而今則於外方漠然無收拾之事不收拾而何以知其才頃日筵中有惜分陰之教予已衰老及今不爲更待何時有才可用者大臣以大臣之所知者及雖不能聞知至誠博問諸道文蔭武知名登對以達其所擢用惟在其上噫遐方草野之士雖不能詳知已通仕路見其面而知其才者豈不能知乎若曰不知則此正鄒聖所謂不爲也非不能也若是而甚事可做欽體此意用副我惓惓之意二十五年命吏曹叅判叅議以長望擬差而叅判以曾擬同經筵已經吏曹叅議定限叅議以曾擬大司成定限

補二十八年金尙魯

時右議政

筵啓曰北路則有士子陞差京叅奉之路而

關西獨無此路清南北讀書固窮之士終身湮沒不但嗟惜之甚亦非朝家一視西北振拔遠人之意也平壤有崇靈殿叅奉二窠依前以南北各一人分差仕滿六十朔後陞遷京叅奉一如濬源殿之例則其所以聳動一路者大矣以此定式施行而崇靈殿叅奉申飭道臣以南北望士各別擇差爲宜矣 上曰今因北關於西關不無向隅之歎欲爲下詢所奏誠是依爲之

三十三 年御營大將洪鳳漢筵啓各軍門教鍊官久勤遷轉之規兵曹三軍門則一都目二人一都目一人守摠兩廳則間都目一人事載於續兵將圖說矣通一年言之兵曹及三軍門當遷三人守摠兩營當遷一人若依此遵行則可以平均無冤而該曹收用之規兵曹爲先三

軍門次之守摠兩廳又次之每當都政因其次第而分排故兵曹則依數遷轉三軍門或遷或不遷守摠兩營全未遷轉雖緣窠闕之狹窄每都目皆用此規故兵曹教鍊官未及四十五朔而已作首久勤守摠教鍊官積仕十餘年無以遷轉當初定式非不爲裁量平均而到今兩營之抑鬱甚矣臣意則從今以後勿論都目散政兵曹各軍門教鍊官必依定式數次次遷轉作爲井間周而復始毋碍於每都政次第先後之法使前都目之未及遷者後都目先爲遷轉俾無不均之弊而如或違越則各軍門草記變通以爲永久遵行之地何如兵曹判書鄭翬良曰近來久勤調遷之路漸廣雖欲盡爲收用窠闕狹窄無以分排守摠兩校之不得遷轉實由於形勢之不得不然然渠輩之稱寃則似無足怪



御將所達周而復始次次遷轉之說誠不無意見臣亦別無異議矣金  
尚魯曰母論兵曹五軍門若當都政窠闕狹窄不得盡爲遷轉則散政  
隨窠隨用如是而猶未盡遷以至後都政則必令先用陳久勤餘數無  
一人未調遷然後始用新久勤是所謂周而復始也今後則申飭該曹  
依此舉行似宜矣

補三十五年 傳曰爵賞人君御世之大權而近來濫雜莫甚若不規  
正金玉將遍滿於國中雲觀譯院及寫字官有領事都提舉有功自當  
奏加奏賞唱準勸懲亦在法典當依舊例施行直赴殿試付標之際有  
做錯者則亦有將臣自可奏而釐正良吏褒加公廨軍器修補狀聞賞  
典亦有舊典此後守僕弓矢人及工匠中年七十非特教則凡諸勤勞

國役有例上言者外請加直赴上言一切嚴禁若是定式之後其門宜正禁旅中騎騶五中先馬帖而後上言直赴者原單子中依軍門例草記別單書入直赴殿試御筆封進其事雖重設意則干恩窮心求得褻越莫甚此則既聞之後卽令捧入勿施其賞子爲其父奴爲其主以孝請褒事體大不然抄猥濫之際一並拔去永付司果之法非特教則一切嚴禁事政院銓曹禮曹捧承傳施行而此後拘於顏面凡於上言或有例下或有循例回啓或有草記之事則備局隨聞草記勿施當該承旨該堂施以制書有違之律備局雖不卽聞耳目之官其宜規警名官之軍器公廨狀聞陞資名武之以雜歧及捉虎陞資名器不重濫觴莫甚往事勿論此後若此者勿許清職納粟以階嘉善者亦勿許實職事

捧承傳施行以示予重官方杜濫觴之意而下此教政院該曹大書以置凡於抄上言回啓之時遵而舉行

補三十八年 傳曰爵賞人君礪世磨鈍之具而雜技上言其道多端軍器公廨濫雜相眩之中近年以來國有多事故一技一事輒皆陞資金玉遍滿國中嗣服以後亞將陞資予則慎之而邊地交差銓曹例據可勝歎哉其中武弁營將陞資自古有之而內將陞資業已禁矣營將瓜滿亦有新制近苛而無濫此則非可論

教曰非大臣國舅勿付領中樞府事雖輔國未經冢宰宗伯司馬之人勿付判事仍爲定制舊例無原任大臣則以輔國陞付領事判事故有是命



四十二年命持正通清勿論八道惟才是通

教曰雨露不擇地而下王者奉三無私之道用人其豈偏也况柔遠  
人之道遐方之人宜先甄用而一自禁掌通之後持正之通不無其  
弊至於西北人今已累年一不檢擬雖以國子分館持難此有不然  
者昔之名相巨卿由於芸閣者多先正文正公李彥迪以芸閣爲名  
賢故相李尙真以校書分館入翰苑至拜相噫自芸閣其猶拜相其  
於通清何拘槐院國子且分館時西北人專歸國子其由何在薦主  
中無西北人故也此後勿論八道惟才通清以除近弊

教曰一遵昔年代柱帖暮年其欲常目諸道文臣陞六後一不經國子  
一不經守令者作爲一帖至國子守令而未及通清者亦爲一帖書入

增補文獻備考 卷一百九十三  
居住科年及其祖先有顯官亦爲懸註以入噫王者用人當一視文武  
奚異宣薦陞六後未及爲摠府宣廳者內外三品後未經營將者亦爲  
書入而科年居住一體書入

續四十九年 傳曰自古戚臣不敢當銓衡其意深也雖然我朝國法  
至嚴於戚臣其無毫疑故古於將望非勳非戚不敢備擬云猗歟盛哉  
其意亦可而觀今世道隄防不可不嚴此後爲戚臣者吏曹三堂兵判  
五軍門大將三司長官國子長望永禁事捧承傳施行以示予暮年嚴  
隄防之意

兩銓受教雜令 生進年三十以上始擬初仕承傳則不拘○教官  
非生進人則不得擬差前衙則不拘○監役學生年四十守奉官學

生年三十以上擬差○叅下禁府都事非生進人不得擬差○叅奉  
奉事直長各仕滿四百五十日陞六○叅奉雖未準四百五十日計  
仕居首則陞奉事奉事陞直長亦同而計除叅奉時未準仕後始許  
陞直長陞直長後計除奉事時未準仕始許陞六○都政時直長仕  
未滿十日以下者啓稟陞六○謁聖庭試別試文武科甲科一人付  
六品職○登科前已經司果者陞六○登科過十年者陳白陞六○  
文臣叅下司錄訓導別檢察訪仕滿三十朔陞六○說書以翰林召  
試時被抄人通清○吏兵曹郎曾經四品人不得擬望○舊例獻納  
望雖玉堂未通銓郎人必經四品後始爲通擬矣銓郎革罷後玉堂  
則皆以當品擬望而兩司則遵古例陞四品後始爲通擬○亞長望



必經納言後通擬而近來只入納言望者循例通擬○曾經副學人  
陞嘉善則直擬大憲庚午因吏判陳白新通備擬○大司成大司諫  
互相往來○禮判政府西壁互相往來若以西壁擬刑工判判尹則  
必啓請後擬差○三司春坊大司成擬望時雖外任承旨啓請備擬  
○曾經大諫人陞嘉善則直擬知申矣庚午因吏判陳白新通備擬  
而曾經吏議人直擬○賓客元非通清而庚午因吏判陳白作爲通  
清之窠雖經吏判人亦必新通○曾經吏判人不與擬於未經吏判  
人之下至於判義禁及文任望不拘叅擬○玉堂擬望時啓請解由  
勿拘而啓請職外不得他擬○時任玉堂居中則直出其代而司果  
居中者之修撰司直居中者之校理循例擬望右職則必啓請蕩滌

○吏判新除之政相避人不拘擬望○解由未出人實職則不得擬望兼職則循例備擬而兼察訪則勿擬○解由雖出有越等人不得擬外任而如都事及邊地付祿窠則不拘○守令之時任承傳則不抱朔數移擬前任承傳則準朔後始擬○未準限守令雖都政營下及物重地大邑州牧外不得啓請○凡議薦望於大臣時首堂進去受薦而開政後則次堂進去單堂上則郎廳進去○諮議出六後更爲通清擬臺望○凡通清文學爲上司書次之正言持平又次之掌通則因傳教革罷○說書不計朔出六所謂朝說書暮正言○春坊則擬於京外閑漫職○蔭官之陞叙承傳人外不得陞品復職○蔭官經詞訟秩卑人經察訪監牧官後始擬守令望詞訟未滿六朔前

移他職則更拜詞訟必經六朔後始擬守令○陵令仕滿百五十日  
前毋論京外職都政散政不得移擬○未經守令講者不得擬察訪  
監牧官○蔭官若經五品則以縣監直擬郡守雖未經京五品若拜  
縣令判官則以外五品履歷直拜郡守○守令講三冊不通汰去一  
冊不通兩次不進兩冊不通一次不進及三次病不進以三冊不通  
施行○六品講兩冊不通汰去一冊不通待後都政更試後陞六○  
兵曹叅知雖是叅議之下不得移擬刑工曹叅議○時任持平掌令  
不得擬獻納○時任玉堂非有承傳則不得擬該司正及外任○兼  
察訪不爲啓請直擬他職○戶禮曹正郎移擬於兵曹佐郎○以僉  
正副正移擬於正佐郎○六曹兩司經右職不得擬其司左職玉堂



春坊則不拘○凡兼臺下批時經執義則付執義掌令持平亦同經  
司諫則亦付執義經獻納則亦付持平若只經正言春坊及未通清  
人則付監察玉堂則各隨其所經職品付兼臺○監察禁府都事不  
得互相往來○監察不得降品擬望○守令年限六年窠則限六十  
五歲三年窠則限六十七歲過此則勿擬○瓜滿貶窠及初仕非判  
書不得差出特教則不拘都政後追來貶窠次堂獨政亦特教差出  
○三曹郎廳非生進人不得擬差贊成有傳教後差出○從二品不  
得擬於知經筵知春秋左右賓客○曾經檢詳有準職承傳而更擬  
者直擬舍人○翰林與知事同知事相避則知事同知事遞惟領事  
則翰林遞○營下邊地守令勿以未經守令人差送○卜相前所帶

提調單提調衙門則遞○邊地守令陞差未準朔勿拘○左右勸讀  
依贊善例無實職爲實職有實職爲兼職○奉朝賀陞資則不待實  
職隨品追榮○南北三使臣雖因事坐罷勿出其代叙用復差○乞  
郡勿論生養家并許施○知義禁府事中陞一品則以判事下批○  
知義禁同義禁通爲三員而以正卿授則爲知事以亞卿授則爲同  
知事○舊例王妃父直付領敦寧今則堂下及幼學初授都正後陞  
付領敦寧○敦寧府自領敦寧至叅奉以有敦寧人擬差○判敦寧  
移拜判書判尹○知敦寧同敦寧都正判書判尹叅判左右尹叅議  
叅知互相往來○敦寧判官主簿漢城濟用軍資判官主簿互相往  
來○宗簿直長非生進人當次則除拜後相換○玉堂春坊講書院

相避啓請擬差○副學拜弘提則遞副學弘提拜副學則遞弘提大  
司成同成均亦同○金吾堂上拜秋堂則遞金吾秋堂拜金吾則遞  
秋堂金吾堂上拜承旨及三司長官則遞金吾○吏曹堂上遞職則  
隨竄爲置處○輔國崇祿大夫不得擬叅贊提學同成均○輔國吏  
曹判書不得執筆於大臣前故薦望時次堂替行○兼輔德以已通  
東壁人擬望○應教乏人則以二望啓擬○引儀移拜主簿別提○  
一經都承旨則不得降授左承旨○都承旨陞資憲後仍帶○左承  
旨以下不拘資級先後一從曾經座次陞降○判校滿三十朔則陞  
堂上居中則兼春秋減下○左通禮滿三十朔則陞堂上○宗簿正  
三十朔陞堂上○宗簿提調無都提調時一員以宗班擬差○亞銓



政直長奉事以仕次叙陞而不得復職○加資承傳人未經準職資窮則啓稟取旨後下批○三司時任亞長資窮準職則承旨望次堂亦備擬已經三司亞長準職人因他事陞堂上則承旨望次堂亦備擬○凡有問于大臣差出之命則罷職及解由未出人破格備擬之意啓稟○自廟堂直入望則罷職解由不拘○大臣備三望送于吏曹者有罷職解由相避則還收改望以來○大臣自辟望則蔭官陞品復職不拘○守令下等人經二年後更除守令或中軍虞候經一考始許無碍○下等人更除守令時本品施行不得陞品○下等蕩滌後京職則當品復職郎署居中則其都目出代○凡帶職人解見任則過一政後送西擬望○吏曹亞堂非判書政不得差出○翰林

陞付不得口傳啓下○三司春坊講書院六曹判書判尹判義禁八道監司吏曹亞堂兼臺不得口傳差出○臺諫承旨吏兵判有闕守令三窠有闕都政後殿最守令有闕大臣置處新恩政事百官加下批并稟政都政及祿都目自下定日入啓○三銓獨政時差出緊任臺諫玉堂春坊講書院官吏曹郎兵曹堂郎刑曹堂郎工曹判書漢城府堂郎監察禁府堂上叅上都事五部官員守令都事察訪○時任玉堂同品則拜移春坊自壬午始○曾經叅知人年八十者依承旨叅議例抄啓加資○凡除職日限三十日而慶尙全羅平安道則四十日咸鏡北道三甲則五十日六鎭則六十日○侍從守令內遷雖以十五朔爲限其若新通勿拘朔數未準朔懸註通清未行依侍從十

五朔爲限事定式

訓鍊正亦如之

○殿最點下者上爲中中爲下○禮兵曹

郎官互相往來○假引儀六員以中庶分半擬差○曾經贊儀不得

擬引儀○北道陵殿叅奉十四員內七窠仍作叅奉三窠作奉事一

窠作直長一窠作別檢二窠作令叅奉奉事直長及令一窠作蔭窠

別檢及令一窠作文窠蔭窠自叅奉至直長準六十朔陞令文窠自

別檢準三十朔陞令陞令後各準三十朔待都政移差京職

英租己丑啓稟

變通

○闡帥年八十人依承旨叅議例歲初抄啓加資○玉堂新錄前

勿許陞擬而廟薦則勿拘○道科元無稟政之事故開政時文武壯

元單付○武科出身皆令赴防於西北邊邑年過六十者親年八十

歲者勿論除赴防則納米兩班子枝勿許除防○武科新及第自內



三廳各抄可合人薦報于兵曹○兵曹取才以入格人錄用而赴防後收用○宣傳官薦人初入仕則叅下宣傳官武兼部將守門將四山叅軍宣薦權管通擬○部將薦人叅下部將守門將通擬○守門將薦人以取才人又爲別取才其優等者次第備擬○叅下宣傳官及武兼仕滿二十四朔計日陞六○叅下部將仕滿二十朔計日陞六○叅下守門將仕滿十五朔計日陞六○四山叅軍仕滿三十朔計朔陞六○桂坊叅下仕滿九百日陞六○權管箇滿以到任月計二十四朔宣薦權管仕滿後直擬武兼而以三甲江界邊將仕滿懸註○叅上武兼守門將未經六品實職前不得直擬於都事判官等職不次別薦之人不在此限○訓練副正以已經叅上宣傳官經歷

訓僉四品人通擬○訓鍊正以已經副正府使兵虞候僉使人通擬  
不次別薦則不在此限○營將以已經三品及守令虞候人備擬○  
舊陞資營將十朔前不許遷轉○水使以已經邊地防禦使人備擬  
○兵使以已經水使人備擬○武臣未經邊地人除拜承旨則以邊  
地履歷施行已經邊地人則以防禦使履歷施行○文兼移拜他職  
則仍帶若移拜臺諫則遞○文兼本無箇滿而庚辰年因特教爲周  
年竄事定式○別軍職新除例付遞兒部將而登科則陞六單付遞  
兒訓鍊主簿陞堂上遞兒僉知各受當品祿若在罷散則自兵曹移  
文戶曹付散料無解由拘碍之規○摠管禁軍將忠翊將忠壯將五  
衛將空闕衛將營將文兼武兼等職解由勿拘擬望○禁軍將罷散

人亦爲擬望其名下以罷散懸註若無叙用之命則政廳承旨啓稟  
○營將及陞堂上窠若以堂下曾經守令三品者備擬而無加資之  
命則政廳承旨啓稟○邊地僉使周年內不得遷轉○曹司衛將例  
以五衛將中備望甲甲年因大臣所奏一窠則以文臣卽爲擬望差  
出仍兼五衛將一窠則依前以五衛將差出○曾經三品者雖時在  
四五品職依例備擬於堂上望而以曾經三品懸註○曾經三品者  
有下等未蕩滌則不得備擬於堂上望還除守令經一考後始許通  
擬○軍職遞兒祿一年分四等四季朔陞降祿都目啓下後且錄職  
姓名移文戶曹照訖付廣興倉題給○四山監役甲戌年受教變通  
改稱叅軍以宣薦出身別擇差出與宣傳官一體調用兼濬川司郎



廳○舊例龍虎大將以單望啓下改以三望擬差○三甲江界地僉使則以經歷訓僉中擬差萬戶則以訓主武兼中擬差○訓練僉正一窠判官一窠主簿三窠加設以各軍門哨官仕滿者備望報兵曹則兵曹試身言書判後訓練主簿備擬後都目減下判官以已經主簿人擬望後都目減下僉正以已經判官人擬望後都目減下僉正則非宣薦則不得擬差○知訓練正二品三望乏人則以從二品啓稟并擬○兩界中軍京畿中軍大興中軍江華中軍履歷與營將同

**續**正祖丙申命復吏郎通清之例

教曰賤名檢而壞廉防爲今日朝廷之痼病管子所謂四維不張不幸近之其所矯救之方不容少緩審矣予則曰我朝士大夫之淬勵

名行以其有官方之不雜也挽近以來仕路之淆亂士夫之紛競日甚一日苟不及時變通則末流之憂有不可勝言銓郎之革實出於鎮朝象破朋黨之聖意而行之已久弊隨而生到今未見朋黨快祛徒致朝象之乖漓是豈先大王蘇革百年積弊之意哉古之銓郎之選蓋取自中飭躬能文之士以開其進塗故年少新進莫不自修行檢韞櫝而待價雖欲躁進其可得乎今復此選則或不能無補於世教之萬一况銓曹堂選既復獨於郎選何可持疑其職則不過堂下之一郎官其所廢置自可隨時而損益其令銓曹復吏郎通清之制○時廷議力請郎選復舊不得已有是令上謂領府事金尙喆曰此事非予本意銓選復設之後弊將不勝其紛紜矣

續命以文臣差出六鎮守令

校理李在學啓六鎮守宰全用武弁惟作履歷不能慎擇故民多受害文武間差自有定式臣意則必以有聲望者間差爲宜從之

續元年命注書薦以通政承旨曾經注書者主薦

續命兩銓之臣就議大臣疏通獎拔之方另加講究文以至於某官蔭以至於某官武以至於某官酌定其階梯以存等威昭詳其節目以廣仕路

續二年 教曰經曰藹藹王多吉士成人材必自教育始太上賓興其次鄉舉里選降及隋唐專尚科制至于我東聖神相承儒賢輩出時則有廊廟之材有干城之材有方岳之材以至百執事而皆任其材朝有



彙征之美野無遺逸之歎人材之興於斯爲盛噫作成之方惟養與教而不能養有素教有方旣蔑德藝之訓廸但有科目之取舍以言乎考試朝廷每疑考官考官輒欺士子上下之不孚如此尙安望搜羅英俊爲國需用乎賢關首先之地未聞通經之譽庠試培養之本徒致尙文之歸靡俗益淪鴻匠不出而至乎武科也醫科也譯科也陰陽律曆之科也弊則皆然同襲一轍以言乎銓選鑑別之智不明僥倖之門大開黜陟則不循考績注擬則未見爲官清顯之啣昉於何代而卿相之媒進有階地閥之用大是無義而寒畯之致身無路教選之方若是乖舛雖欲致治不亦左乎以備例之事言之循資之法所以防濫也甄叙之規所以䟽滯也廉節之褒及其子孫貪墨之懲至於沒齒政府舉方伯

地補文獻例考 卷一百九十五  
之才藩臣薦遣逸之士而斯皆末節也安有成人人才之可言乎欲懋本也豈無其道也故曰周王壽考遐不作人不其然乎

續四年命輔國之兼內閣提學旁照式例稟處

右議政李徽之啓輔國之不得兼提學自是古例頃因重臣之援例疏辭旣蒙許施而內閣與兩館似無異同以其新創之故未有一定之規今以直學言之資憲之不得兼帶作爲定例則此亦不可不一番釐正請下詢處之上詢銓官吏判金鍾秀曰本閣提學之於兩館只可旁照非有銓法之可以援據者矣仍詢左相左議政徐命善曰勿論館閣提學則一也兩館提學輔國旣不得兼帶則今於閣職似不異同矣教曰此亦事係定式令銓曹之臣旁照定式以爲稟

處

續命直閣以曾經玉堂人待教以翰注及說書通望人薦狀事閣誌中  
釐正從提學金鍾秀啓也

續五年命直提學直閣待教例兼知製教

教曰提學既兼考試與詞命之任則直提學以下宜兼知製教事理  
當然此亦未遑未及定式此後本閣直提學直閣待教例兼知製教  
依玉堂例爲之至於製述分排之際非待教不得差定事分付

續領議政徐命善筵啓我 聖上嗣服之初復出銓曹堂郎通塞之  
規俾有以激濁揚清各自標揭此誠駕馭之長策作成之要道復舊  
以來爲是職者皆不過侈其官啣誇其榮耀而已其所通塞果能允



恆物情否其所激揚果能聳動人心否取舍黜陟不問才學之有無  
先後差排惟看門閥之高下喬木之裔識昧魚魯而坐占清顯之職  
委巷之士閱盡螢囊而棲遲冗散之班涇渭無別駑騏同進凡今素  
無志守但謀進取者何必苦其心思勞其視聽味無味之書而講不  
講之業乎不矯此弊而但求名檢之自礪雖家喻而戶說必未見於  
變之美臣意自今銓曹通塞毋規規於門閥惟以文學才猷爲之權  
衡而尤於激揚旋別之政着意修舉如或有蹈襲前轍不思更張者  
當該銓曹堂郎亦從以施罰使當世之人咸知才學之爲先名檢之  
爲重則才彥可以輩出風教可以賁飾

八年持平鄭萬始所啓仕路之積滯去以益甚疏滯之教屢下甄

復之政時行而積屈之患虛老之歎猶復前日者必有其故蓋國初  
蔭官入仕之路甚少故內外叅上之窠皆以文武差遣有不足然後  
始以蔭官填補窠常有裕人無積薪自其初仕漸廣蔭官日多通計  
朝籍始與文武相叅三歧并用一斥不復躁競轉甚湮鬱莫伸寢郎  
陵官雖有變通之政而見今蔭官初仕之窠比諸國初猶不翅屢倍  
若不更加變通之道以減其入仕之路則叅上積滯之患無可救之  
道請令廟堂亟講善變之道以爲矯弊之地 上曰依啓

續大典通編 吏曹郎廳堂上選擬堂下清望則使郎廳依前通塞堂  
上郎廳相議可否無行公郎官時長官與他堂上相議通清○復銓郎  
法姑許羣請  
隨時沿革○祭酒贊善進善司業諭善勸讀有實職則爲兼銜無實

職則為實職○元子師傅正二品元孫師傅從二品

王孫教傳官制朔數依教官例

○

代聽時春坊實兼官皆兼帶春秋銜○知義禁陞一品則以判事下批

雖有時帶判事勿拘陞付

○都承旨陞資憲則以兼都承旨下批○武臣判義禁經

兵判後通擬○卜相時無時任則原任入侍前單點下加卜待時任出

仕○文蔭武曾經實職人員在鄉身故地方官報觀察使侍從以上則

啓聞餘報吏曹○荒年賑政非通一道設賑則勿許首褒加資○乞郡

勿論所後本生家并許施

○雜令 牙山作三年竄連二次無欠上納陞叙調用 英祖庚寅受教 ○法

聖兩次無欠漕運陞邊地 辛卯受教 ○群山 辛丑依法聖例定式 ○營下邑及光羅忠

尙外毋得啓請 甲午受教 正祖丙申 ○吏曹亞三堂依古例三望

又以星州一體啓請



擬入○吏曹郎廳罷侍從復銓郎通清之制○校書校理三員依前

復設

以上正祖丙申受教  
戊戌定以校書館自辟

○歸厚署權罷

丁酉受教

○芸閣提調一

窠以奎章閣提學例兼○芸閣兼校理三窠中一窠以直閣例兼一

窠降爲叅下待教例兼一窠永罷

以上戊戌受教

○能麼兒郎廳依初仕例

以未副薦差出自兵曹遷轉○內侍教官革罷○芸閣唱準窠中除

出四窠名以檢書官以一名人啓下○喬桐罷水使仍爲防禦使作

爲陞資窠以二十四朔爲瓜限

戊申遷陞水使罷防禦使

○蔭叅上十窠除出添

補文叅上○水運判官革罷○全羅都事海運判官之號減下

以上己亥

受教

○畫員中一人以東班職遷轉而以禁漏官輪次

辛丑受教

○奉常判

官依兵曹軍色郎廳例自本寺自辟

壬寅受教

○麗陵叅奉自本府自辟

單付○禮賓提調依軍器提調例以戶曹判書叅判擬望受點○儀

賓府入直以空省記啓下

以上癸卯受教

○因吏曹判書尹著東所啓逆賊

胎生邑降號事以時居邑換降事定奪○因北伯狀啓長津柵陞爲

府使以邊地窠定式○因奎章閣提學金鍾秀所啓勳府自辟禮賓

叅奉一窠以銀印諭書差備忠義自本閣自辟事定式

以上丁未受教

續十五年命以禮曹叅議爲吏議之階梯大司成又爲副提學之階梯

續命舟師大將以守摠兩使通融備擬

續十六年命各營亞將及諸將官之視大將資高者并勿拘隨行

續飭譯學子弟勿走他歧

續十七年命水原府留守以正卿以上差擬亞官以蔭官中五品判官

差擬著爲式畿伯例兼留守壯勇營都提舉以扈衛大將所帶之大臣單付

續命文衡圈點從座次釐正事載之政府文苑謄錄

續十八年命文衡望勿用換單此後亦勿用倒薦載之故事

大提學洪良浩疏畧曰文苑故事若是同點則例當隨品定次而資

級失序猥蒙恩點亦添難進之一端也

時金鍾秀薦文衡沈煥之以亞卿居正卿洪良浩之上故

有是疏

教曰今番文衡圈事都堂之未及照檢有三焉點爻之每人各

書此一也此則雖已傳諭於領相使之改書而同點倒次似以草單之如許爲說此有不然都堂之圈異於文衡之叅圈未嘗有準點次點區別之例此二也此則欲待文衡出肅後釐正矣更思都堂事都



堂當釐正矣從座目更書之意傳于領相以凡受薦之圈坐賓廳先爲啓稟既完之後又當措語書入而今番不爲此亦不察此三也以此傳教載之政府文苑謄錄俾後人知舊例

**續命**時任檢書官一人依定式付實職

**續命**邊地守令僉使之未準瓜而用履歷者一一查出并爲勿施仍飭此後特教外一遵定式

**續**十九年定亞銓三銓長望之例

**續**復定輔國重臣帶內職及資憲以上重臣帶外任者付判敦寧知敦寧之式

**續**命復原任大臣以判敦寧置處之例

續申明文宰付護軍之例

續定宣傳官武兼部將守門將叅下武臣兼屬內禁衛之式

續二十年命諸道薦進人及外此可合別技需用者令廟堂嚴飭銓曹先從兩南收用

續命法聖羣山兩鎮僉使勿用邊地履歷

續命江界祥霸坪移屬厚州陞厚州爲獨鎮用僉使履歷

續命司僕內乘以曾經亞將與承旨雖至正憲資憲通融擬望著爲式

續命訓鍊院新增三窠中文臣甄復最久者自吏曹以相當窠區處以

東班實職差代仍定其瓜限三十朔

續二十一年命典牲署主簿一窠陞作判官以蔭官差出著爲式

續命壯勇營教鍊官一窠定爲壯勇衛遷轉以左右列講劃都居首者  
隨窠遷轉

續命景慕宮官員勿拘詞訟直除守令仍爲定式

續命都政時銓郎權減者前一日差出著爲例

續二十二年命以判敦寧爲開城留守者仍帶敦銜

續命南行部將通擬都摠都事著爲式

續二十三年命直講典籍依舊典兼帶三司

續純祖元年兵曹判書趙鎮寬啓厚州以新設之所招集撫摩正須擇  
人臣意則依長津例以邊地施行恐合事宜從之

續三年命邊地守令僉使履歷以十五朔定限



左議政徐龍輔啓武弁邊地塞上絕遠之地故以徑遞爲幸數遞之患躁進之風皆由於此請以十五朔爲限從之

○吏曹判書徐邁修啓健陵令俞漢石以叅奉陞六而因特教權作令窠仍拜矣日後遷轉差代時本窠以何品擬入乎請下詢處之左議政徐龍輔曰既有叅奉一窠此則仍作令窠似好矣從之

○四年命庶流蔭武疏通

左議政徐邁修啓庶流之已經京司詞訟而猶不許直擬守令武班則既許營將中軍而不借階秩之品級反不如雜歧安有如此官方乎臣意則庶流中已經詞訟者許令直擬守令武班之有地處履歷者軍器僉正之例以爲陞品之階似合於疏滯之一助矣從之

續五年飭銓曹釐正郎階命曾經玉堂拜臺職者以已署經施行著爲式

續七年命彌串僉使改稱薪島僉使使之移鎮該島仍作履歷窠

續八年命北道權管一窠仍作遞付窠以本道出身擇差著爲式

續命古群山僉使還作久勤窠

續命守令居下蕩滌者經二十四朔後始許外職舉擬之規

續申明知事等職差出之規

左議政金載瓚啓武職之禁軍將五衛將即文職之諸曹叅議也且五衛將職在宿衛所重自別近雖爲遞兒之窠而是亦名器也古則非宣薦無得濫授雖或有中庶間差而絕無僅有一名則必是登正

科經正職者然後始許舉擬中人則內醫及象譯外未嘗爲之而雖醫譯亦無自中功勞履歷則無敢居焉近年以來此法蕩然凡間散白徒之類賭得空名帖視作階梯無人不徐以是之故宣薦武臣羞與爲伍云此後則宣薦外一名則非出身之曾經守部將僉萬戶者勿論中人則非內醫之曾經實職者象譯之曾經行中首譯者則并勿論至於知事尤重於五衛將古則判中樞加設之前大臣置處例以知事爲之此豈可爲醫譯輩應付之窠也首醫首譯及有承傳外無得舉擬而必爲單付啓下之意請申飭該曹仍爲定式從之

續命江界十鎮準瓜邊將居中考者勿擬右職著爲式

續九年命邊地居下守令邊將勿用履歷



續十年命蔭官叅下通計叅奉仕日陞六三十朔初仕窠并許一例通計

續七月申明邊地窠差擬之規

左議政金載瓚啓言武臣邊地自有階梯若非已經訓正者則內外將履歷之前無得直差邊地之意請申飭從之

續命有地處無薦歷堂上武弁檢擬五衛將

續十三年命備邊郎四窠左右捕廳從事官四窠兩營把總各一窠權作實職

續十五年命承文判校以通清文官差擬

續六月飭西北人許通槐圈宣薦

續十八年命加里浦僉使陞作履歷窠

續十一月命泮長與禮議通望依舊例施行

續十九年命議政府錄事依前例四十五朔遷轉

續二十三年命文官陵令十窠以蔭官換差

續命武弁別歧加資者除內外將滿十五朔後始擬邊地

續二十六年命光州順興朔寧奉化殷栗玄風狼川慈山德川洪原等

十邑以文官差送著爲式

續二十九年

文祖代  
聽時

令曰講書院衛從司官員并勿拘常格擬入山林

與他自別勿拘資級師傅以宋祭酒

釋主

吳贊善

熙常

單付以入右勸讀依

右贊讀例以兼職施行

續三十一年六月飭雜歧加資倖進及蔭仕淹滯之弊

左議政李相璜啓近日躁競之風有識憂歎至若武臣之雜歧加資太無節而尤爲弊凡有中外大小國役宣部薦武臣之有恃挾工進取者百計竄名於監董看役等請賞秩中雖下此而牌將名色亦皆圖占竟蒙恩資則又奔走鑽刺如內外將中軍虞候等任殆與久仕積勞者漫無區別一例躡取故所謂雜歧加資遂爲陞進之倖塗捷徑靡然波奔若無止屆不可一切禁抑雖以朝家官方言之倖進者有時占先積仕者及或居後臣於先朝時亦有所及見者內而試射恩資外而繕械賞典雖非目下雜進之可比自好者幾皆不願銓家所以處此亦有軒輊於其間其所收用每後於循資級多踐歷



之人故風氣猶自可觀已往雖不可追此後則自繕械賞射之類履歷通擬之際每示別於先後彼此之間庸寓勵廉之意而此猶如此況外此雜歧乎似此之類凡於階梯移遷之官職雖有可用人毋得或先於有歷之他弁嚴立程限俾無踰越載之兩銓掌故以爲永久按之地雖以蔭路言之年勞序進如唐之攷功漢之增級其制甚嚴其義斯美近來陞六則每多橫出序計反少移陞則輒注陞叙治蹟不由以至於傍歧雜路互遷各司虛銜區處迄無已時守令擇差便屬餘事雖有良手能才之可任者偶一遞罷無望復職此後則積仕元出六及十考十上隨窠卽差其餘橫出虛銜與前仕叅互填差而每以有吏才著聲績之人慎擇甄用之意并申飭於兩銓每於此

增補文獻備考 卷一百九十五  
一  
深留 聖意毋輕施與常存愼惜是臣區區之望從之

續 憲宗十年兵曹判書李憲球啓灣府京別武士取優等三人啓差邊將以爲邊圉獎武之方從之

續 十四年命南行宣薦以十人定式

續 哲宗元年領相趙寅永奏曰臣聞爵賞者命德也勸功也一或踰濫有關四維不可以不慎計今文蔭之在籍自通政以上大略爲二百七十人而自堂下三品以下不與焉若韜幹之列殆不可搜數於是乎禮讓之風日衰廉耻之俗日降非一朝一夕可以挽回也雖曰濟濟多士文王以寧恐不若是之甚也伏願惕然於此務加裁損以存嘖笑之義焉

續四年命各殿陵別檢四窠陞作蔭令典籍四窠爲叅下窠宗簿主簿權作蔭窠

續命雜歧武臣待兵馬節度使履歷後始許擬摠管

續五年命華城廣州兩居留以原任大臣中往往委寄從領相金左根之請也

續八年命庶類文科施槐院分館

左議政金道喜啓因掌令李杓疏請庶類文科擇其有地閭人依武科宣薦例施以槐院分館事有令廟堂稟處之命矣武科之特許宣薦出於朝家疏爵之政文武一體宜無異同特爲許施而武之宣薦旣非人人可得之事則令槐院亦宜各別慎擇毋至淆雜以此作爲



新式恐好矣從之

續觀象監提調洪在喆啓本監三學科取各異肄習不同而挽近以來三學或有不拘他學互相入仕之弊名實相舛莫甚於此既往雖無以追究從今三學入仕毋得以他學決科者通融去來之意請揭板施行以爲永遵從之

續命成均館直講典籍承文院校檢奉常寺僉正主簿以曾經臺侍通擬香室以芸館叅外人計仕入直首仕差送外郵

續命十考十上五考五上守令遞付京職後次第檢舉

續命法聖群山僉使以邊地履歷施行文殊鎮別將爲龍虎營自辟窠

續九年命文蔭武守令以七十爲年限

續十年命老蔭擢第直堂者通文職後始許泮通

續今 上二年命典翰以曾經東壁人通清

續命都承旨例兼弘文直提學母得兼帶藝文直提學十一年復舊例兼藝文直提學

續大典會通 宗親大君王子君夫人外不用邑號○宗親妻依文武官命婦例封爵○罷銓郎法○內閣提學拜相陞付本閣大提學○留守拜諭善則仍兼○經筵日講官以提學副提學已通人啓差○水原廣州留守或以原任大臣除拜○宗姓二品以上宗正卿隨品下批大君王子君則領宗正卿大臣上輔國及正一品則判宗正卿從一品正二品則知宗正卿從二品宗正卿○武將階正二品者直擬兵判陞一

品則亦擬判義禁○宗親儀賓官階并同東班官階○宗正卿以諸君及宗姓朝官二品以上無定數啓差都正一員加設以宗姓文官差出有司例兼典籤有大君時自辟典簿有大君王子君時自辟主簿永作自辟直長非生進則不得差從他司序陞則換差叅奉忠義郎廳各一員亦以宗姓人永作自辟叅奉序陞忠義郎廳并四十五朔陞六品兼郎廳一員以郎廳前銜人自辟單差○議政府都相原任議政兼堂上無定數啓差吏戶禮兵刑曹判書工判同三營大將摠戎使四都留守大提學扈衛大將左右捕將例兼有司堂上四員八道旬管堂上八員原任將臣以堂上啓下○忠勳府兼都事一員以嫡長忠義六品以上前銜人自辟單差○敦寧宗姓勿限寸○叅外禁府都事依奉事例序陞



七品○奎章閣檢書官滿三十朔遷轉兼檢書官無定數○香室直宿校書館叅外官仕日最多者郵官差送○都承旨例兼弘文直提學未弘文錄人毋得下批○弘文館典翰以曾經應教人本館圈點副提學典翰爲實爲兼亦以原任差檢校○奎章閣檢書官前銜中二員自弘文館以兼檢書官自辟○成均館直講典籍各一員本館自辟○尙瑞直長每都目不計仕陞遷○承文院都提調時原任議政例兼○廣興倉令以實職中曾經守令人奉事以叅外實職人戶曹自辟奉事以上次次陞付至主簿仍用詞訟滿六朔令加設陞付軍資監判官奉事自辟及陞付之法同○守令瓜限六年者以六十八歲三年者以七十歲爲限至七十三歲遞○江陵大都護以已經府使義城臨陂縣令谷城

縣監以已經守令人差出

物衆地大降號邑同

○未經守令人雖經內外將勿差

邊地守令○庶孽䟽通更定節目文官限從二品許左右尹及戶刑工

叅議通清只許臺職蔭官限牧使初仕部都事監役守奉官無碍武臣

限從二品兵使如摠管亞將西北閫訓練正副正及廟社陵殿官桂坊

教官勿許各道抄薦才行者一人隨其閱閱許槐院宣薦○經筵官解

由勿拘○士庶人百歲人直超崇政○大小科回榜人加一資雜科同

○閣臣贈職閣銜隨品例兼受贈人文科則雖未經閣職亦許兼贈○

受贈人非抄選南臺母得贈大憲祭酒○上輔國贈上相○凡相職褒

贈筵稟外勿許○父母移葬祖父母歸葬移葬伯叔父母親兄弟及外

祖父母歸葬移葬并給暇○龍虎營 純祖癸巳減內禁衛一百今爲

六番○宣傳官取才加五員部將取才加十五員火砲禁軍本營標下  
出身減二今爲二十五○宣傳官十四員武兼十二員部將十五員守  
門將十八員叅軍三員分屬各番內禁衛一番將以防禦以上備擬各  
番將曾經守令及外將備擬○統制使依摠戎使例以外登壇施行○  
統虞侯改稱統制中軍以曾經兵使人擬差○統禦營置中軍○江原  
黃海中軍平安兵虞候咸鏡南北虞候上土加里浦僉使履歷與營將  
一體施行○外職相換勿爲通計前仕○兵水使未肅拜而遞者勿許  
履歷

繼命宗親所帶厨院監膳提調三窠復舊例以朝官通融備擬

繼命喬桐中軍許用守令階梯海州中軍爲新資之窠從領議政趙斗



淳啓也

續命左右贊成以曾經文任吏判人擬望以入

續命扈衛大將捕將以政府例兼堂上啓下

續三年命武將初階直超資憲文臣登壇亦用此例

續命龍媒僉使依他道自辟例準許

續命江華留守以鎮撫使下批中軍以曾經亞將差送

續四年命輸城察訪許用守令履歷著爲式

續上 教曰松都新及第王庭揚聞是勝國遺裔也始有科聲爲之可

幸兵曹叅議除授以示朝家眷眷之意

續命禁軍別將以二十四朔定瓜限

續五年命南兵使東萊水使并自三軍府薦望

續命蔭官牧使陞資者調用佐貳從領議政金炳學之言也

續命三軍府事曾經將臣中以兼卿隨階單付仍以三營將臣定爲有

司

續七年定通清次第

已通兩館提學及副學人直擬經筵堂品副提學陞嘉善則亦直擬  
經筵已通經筵而若經兩館提學及副學人直擬亞銓先通提學副  
學而直擬經筵者通擬亞銓已通副學人直擬泮長已通泮長而若  
經副學則直擬三銓

續命曾經文衡勿擬兩館提學曾經弘提勿擬副學

增補文獻備考 卷一百九十五  
續命平安道武烈祠叅奉二窠令李提督後裔及道內振武士收用瓜  
限前切勿遷轉

續十五年八月領議政李最應啓濟州一島僻在層溟之外朝家眷念  
視他有別文官旣許槐院而武臣則不許宣薦寔非均一之政此後則  
擇地閤許越宣薦之意請分付銓曹從之

續十九年七月 教曰我國之尙門地誠非天理之公也國家用人何  
限貴賤今當更始之曰宜恢用人之路凡西北松都庶孽醫譯胥吏軍  
伍一體通用顯職惟才是舉如有奇才異能者內而公卿百官外而方  
伯守令各舉所知送赴銓曹予將擇而用之

續十二月設減省廳汰冗官



宗親府宗正卿自今大王十寸外并減下議政府堂上年七十以上并減下忠勳府堂上只出有司一員忠義自辟勿施就勳裔中隨闕單付五衛都摠府革罷郎官并屬之兵曹稱以員外卽四所衛將并屬龍虎營訓練院增設同知事二員扈衛廳大將別將并減下訓局旣已革罷局別將減下司導寺內贍寺內資寺司宰監義盈庫掌苑署司圃署並革罷郎官屬之戶曹稱以員外郎瓦署造紙署革罷郎官屬之工曹稱以員外郎惠民署活人署并革罷惠民署官生屬典醫監活人署郎官屬之禮曹稱以員外郎武兼廳革罷舟橋司革罷幸行時舟橋令禁衛營舉行濬川司屬漢城府能麼兒廳革罷內弓房革罷六曹郎官之區別文蔭武有碍於隨材通用自今勿拘檢擬

摠管既已革罷自今殿座與動駕時寶鈞侍衛四人令該曹以在京無故人長望受點

續命廣州中軍珍島青山島格浦絕影島東洋大興僉使及統禦中軍復設並作陞資之窠

續二十二年命侍講院兼說書以待教翰林圈人差出兼弘文正字陞六後直擬應教弼善以下以直閣圈人差出陞資後直擬大司成輔德兼輔德以通副提學人依奎章閣直提學例長望受點陞嘉善則直擬亞銓至正二品仍帶賓容通文任人依奎章閣提學例長望受點典書官依奎章閣檢書官例差出

續二十四年二月命昌原府使水原中軍以嘉善排擬

領議政沈舜澤啓喬桐之作防營會寧之兼監理武臣晉階之路塞而不通衆論愈鬱臣意則昌原府使水原中軍依喬桐會寧例以嘉善排擬若以堂上兵使除拜使之陞資則庶或爲疏鬱之政矣從之

續二十八年命領議政沈舜澤特拜兼兵曹判書

教曰禮遇之地細小舉行似不穩當實兵曹判書差出矣諸般公務兼判書主管舉動時別侍衛與凡於稟事實判書爲之又 教曰若有兼兵判之時則兵曹實判書所用印信依古事用內兵曹堂上印本兵手旗實判書用之兼判書專摠內外戎政不可無司命手旗以內外諸軍司命爲之

續三十年命曾經桂坊而登第者特令直通銓郎後仍擬春坊著爲定



式

續三十一年六月設軍國機務處置摠裁會議員等妥商大小事務

續議定銓考條例

設銓考局攷試各府衙選舉人其試驗有二法一曰普通試驗國文  
漢文寫字算術內國政略外國事情內政外事俱發策二曰特別試  
驗准該人所帶選狀內所註明適用才器單舉發題○普通試驗後  
許赴特別試驗不中選者銓考局具文通知于該人所舉之府衙中  
選者成給銓試狀以爲該大臣憑考○凡有銓考狀者該局課內陞  
差則不必更要試驗又退任者復仕同局課則不要試驗

續七月正文官授任式

一曰勅任自正一品至從二品二曰奏任自三品至六品三曰判任自七品至九品○勅任官均由聖簡總理大臣會同各衙門大臣及贊成都憲協議公舉備三望奏聞取旨點用○二品勅任官正從之階均由聖旨裁奪初授爲從二品仕滿三十六個月終始廉謹例陞正二品其有殊勳奇績者聖旨特陞不在此限○奏任官由各該衙門大臣秉公選拔開具該員官職姓名年貫居住並學識履歷呈送總理大臣轉付都察院評議可否還呈總理大臣奏聞施行○奏任官陞秩自六品至四品仕滿二十四個月終始廉謹例陞一階自四品至三品俟缺陞補惟未滿二十四個月者不准逕遷其有成績可紀者不在此例○判任官各該衙門大臣選取人員送銓考局試驗

後由該大臣直上薦書于承宣院啓下成給奉教職帖○判任官陞秩仕滿二十四個月終始廉謹者例陞一階惟陞遷奏任必須送驗銓考局復照第五條施行其有才諳稍異者不在此例○技術官各隨其才分別收用不拘資格另定俸金事

○光武二年命地方官初任者無逾四等郡各府部院奏任官在職三個年已經試驗者不在此限郡守之治績顯著者對前郡等陞一等其已在一等者外而觀察使內而各府部院廳勅任官陞任

○九月改定中樞院官制

議長以聖簡勅授副議長因該院公薦勅授議官則半數自政府曾有勞勩於國家者會議奏薦半數自人民協會中以二十七歲以上



人通達政治法律學識者投標選舉以十二朔爲任期期滿前一月

預選後任議官

仍未施行

續三年二月命成均館經義問對時務策被選人及京外宿學被薦人叙博士者自各府部院廳量才收用

續四月命地方官吏不得已轉調之境倣照舊典二個年後可得移遷  
續五月命文事官員不得被選於元帥府


續四年九月命外國語學校醫學校中學校卒業生直叙該校教官待該教官有闕試驗填任

增補文獻備考卷之一百九十五

增補文獻備考卷之一百九十六

弘文館 纂輯 校正

選舉考 十三

 附久任 只錄一拜在任多年人

新羅奈解王二十五年伊伐滄利音卒在任十四年

眞興王二十三年伊滄異斯夫滅加耶國時在任已五十一年

高勾麗次大王二年左輔穆度婁辭疾免在任二十五年○同年王殺

右輔高福章在任亦二十五年

二十年左輔菸支留近立新大王在任已十九年

新大王十五年國相明臨荅夫死在任十四年 年一百十三



山上王七年國相乙巴素卒在任十三年

東川王四年國相高優婁卒在任二十八年

中川王七年國相明臨於湫卒在任二十五年

西川王二年國相蔭友卒在任十八年

烽上王三年國相尙婁

蔭友子

卒在任二十四年

百濟始祖四十一年右輔乙音卒在任三十年

多婁王七年右輔解婁卒在任十二年

二十一年左輔屹于卒在任十五年

高麗睿宗時兵部侍郎李公壽在任十四年以稱職聞

仁宗時殿中侍御史朴挺薨出入臺省幾二十年

毅宗時太常錄事林民庇在任凡九年○同時納言柳公權在任七年  
啓事稱旨裨益弘多

明宗時任濡掌制誥十四年高文大冊皆出其手同時直史館李仁老  
出入史翰凡十四年

高宗時直翰林院金坵在任凡八年

恭愍王時代言元松壽典機務凡八年○翰林學士李穡掌機密凡七  
年

臣謹按任職久然後始可以責成而至於麗朝官制拜罷未易  
領會若夫奸臣執權不有君命遲速由己者不可比論於久任  
茲以具僚若而人依例收入

本朝 相臣久任

只錄在任實數○累十年條  
不爲合計○文衡以下并同

黃喜二十四年○尹弼

商十六年○尙震十五年○洪應十四年○鄭光弼李浚慶并前後重

卜各七年○鄭昌孫沈連源金在魯並各十一年○尹殷輔十年○李

原盧思慎南袞李惟清洪彥弼尹仁鏡盧守慎鄭太和並各九年○趙

浚柳廷顯尹漑權轍鄭仁弘金壽恒並各八年○孟思誠申槩河演申

叔舟韓致亨成俊柳洵朴淳柳永慶申景禎宋寅明並各七年○洪樂

性蔡濟恭並各五年○金載瓚十一年○南公轍五年○金炳學八年

○沈舜澤十一年

文衡久任徐居正二十三年○卞季良十四年○李荇十二年○權隄

十一年○鄭麟趾申用漑申光漢李爾瞻並各十年○金貴榮九年○



崔恒八年○金安老金壽恒並各七年

卿宰久任

侍從  
并附

金宗瑞李季全柳聃年並兵曹判書各十餘年○安純

曹錫文黃慎並戶曹判書各七年○李溟戶曹判書八年○尹思翼工

曹判書十年○李石亨判尹七年○任說判尹二十年○梁誠之大司

憲九年○宋贊工曹叅判七年○朴錫命都承旨十年○安崇善都承

旨六年○金墩承旨七年○尹祥大司成十六年

將臣久任李浣訓鍊大將十七年○申景禎訓鍊大將十五年○金聖

應訓鍊大將十四年○柳赫然李基夏並訓鍊大將各十二年○申汝

哲訓鍊大將八年○具仁垕訓鍊大將七年○金錫衍御營大將十八

年○柳赫然御營大將十四年○李曙御營使十二年○李時昉元斗

杓并守禦使各九年○閔鎮厚申思哲趙觀彬并守禦使各七年○具仁堅摠戎使九年○李時白摠戎使八年○金重器摠戎使七年○李章吾訓練大將五年禁衛大將八年○李潤成禁衛大將七年○李敬懋徐有大并禁衛大將各九年○朴準源禁衛大將六年○魚有龜御營大將八年○朴文秀洪鳳漢并御營大將各六年○金漢耆御營大將八年○李柱國御營大將七年○李漢豐御營大將六年○李基夏摠戎使十四年○李宇恒摠戎使七年○具聖任摠戎使十二年○金基厚摠戎使八年○金祖淳金炳國并訓練大將各八年○申櫜訓練大將六年○閔泳煥營使六年○李鍾健營使十年○韓圭嵩營使九年

外任久任朴燁平安監司六年○金蓋國平安監司五年再任又一年  
○李慶祿濟州牧使八年○朴毅長慶州府尹八年○李時言平安兵  
使前後各四年○李守一四拜北兵使前後在任十五年○禹致績平  
安兵使五年○金世鎬慶尙監司六年○南廷順按撫使七年

世宗七年行中外官久任法初久任之議起於河崙然未得建議施行  
領議政府事柳廷顯禮曹判書許稠亦嘗勸 太宗立中外久任法

太宗嘉納其言而未卽從之及 上卽位廷顯稠每勸上行之至是稠  
爲吏曹判書 上遂決意立法京官主錢穀者三朞守令則六朞集賢  
殿上書言守令六期之不便或言不可變 祖宗成法或言有害於民  
或言官制案舛或言養親久闕或言子女婚嫁失時 上皆不聽



中宗九年 教吏曹曰國家治亂係於用人用人得失實在政曹而近觀除拜每有驟陞之弊曾聞 祖宗朝雖正副正之間多老於其任而不喜用年少者故躁進之風戢矣至於臺閣付以言責而曾未數月輒移他職有違委任責成之意卿等其戒之

宣祖十四年李珣筵啓曰若行親政則當用久勤超遷之法明朝羅欽順建請用此法而中朝不克從之我朝 世宗朝用人以此法故其時庶績咸諧今之官爵若使朝更夕變則有同兒戲百事不可做矣

又疏曰古者爲官擇人久任以考其績今則爲人擇官不論才之當否惟以多歷清要爲榮故朝遷暮移一人盡經各司如是而求其不

癯厥官者未之有也今若不改此謬規則治道無由成矣

吏曹判書李德馨啓曰官吏數易之弊古人之言備矣我國之政尤甚頻數今日除拜明日見遷席不暇煖何職之能察臣前日忝爲兵曹亦非甚久而前後郎廳朝來暮去有同驛傳纔責一事於一郎而數日則已遞新官代色問其所掌惟望吏口輒從傍對或因事招問戶曹郎廳亦如是焉軍兵錢穀應用之最急者而此猶不能久任何事可爲乎官員爲過客而吏胥爲主庶事日紊職此之由六曹郎官勿論物望高下但當極擇其人器之相近與否分責其職勿許遷動佐郎仕滿則陞其司正郎正郎仕滿則移拜可合之地或仕久而有顯效者破格陞擢至於小各司亦依此例奉事有闕則仕雖未準以

其司叅奉陞之直長有闕則以其司奉事陞之仕未準以陞拜者仕滿陞實如中朝署職之例六品陞叙時通計其叅下之仕酌量其勤勞之效以爲次第則職任專矣

三十四年大司諫黃慎筭曰近歲以來郎署各司之官遞易太速一年之間踐歷數司或有未數月而屢遷其職者或未旬日而遷授遞紛紜坐不煖席雖有過人之才茫然莫知所掌之何事況其庸拙者乎請宜復立各司久任計仕陞遷之規

李暉光曰在前凡官必計朔陞遷如銓曹郎官非滿三十朔則不得遷轉例也鄭錫堅自吏曹佐郎陞持平諫院啓以銓郎未個滿而陞遷不可降爲刑曹佐郎先王朝唐興府院君洪進由六品



二十餘朔拜獻納猶以驟陞引嫌近來則朝除夕遷陞秩無漸矣  
光海三年戶曹判書黃慎啓曰大小官人必久於其職然後可以責  
其成效譬猶樹木之根必久着於土然後生意流通枝葉張旺雖有  
天下易生之物者朝徙而暮移則必至於枯悴何能望其開花而結  
實乎哉我國官制循資遞遷故叅下之官惟以計日陞遷爲念叅上  
則遞易尤數希望好官圖擬守令漫不知所職何事該司之官有同  
旅邸之閱客旋差旋遞舊席不煖新手又生如是而可望其詳知顛  
末照管官務乎自今以後各司之官勿許遷動皆令久於其任如古  
倉氏庫氏

仁祖元年右議政申欽筭曰官僚數易吏執其權所司叢脞皆以此

也臣願六曹郎僚各司庶官一依法典箇滿之制無徑遷焉其有當官不治者則百隸六府常加糾摘以報政府則政府雖無署事之名六府庶司有所統屬而矜式矣

七年命司藝直講以侍從兼差久任吏曹啓曰近來儒生絕無居齋者且大司成雖或極擇人望未久他遷何久責其勸課之效哉今以司藝直講各一員極擇名官兼帶久任雖遷臺侍不改兼帶專意教導則庶有益也從之

十七年領議政崔鳴吉啓曰大典吏典六品以上官員仕滿九百日方許遷官 祖宗朝謹守此法六曹郎廳佐郎三十朔方陞五品正郎三十朔陞四品故職事無曠廢之患仕者無驟進之嫌壬辰以後

事多苟簡此法遂廢然臣及仕宣廟末年其時仕路之淆亂豈至於今日之甚乎臣嘗慨然於此前月二十五日朝講時語及戶兵曹郎廳因舉祖宗朝正佐郎各三十朔之例陳於榻前上教曰今亦如是爲之可也蓋臣之所陳本意通六曹爲言而記事者因其時有戶兵曹郎廳說話故舉行條件專以戶兵郎廳久任爲言者誤也大典本意六曹皆爲重選奚但戶兵曹久任而止哉且見再昨政目戶曹佐郎黃德柔除授本職未滿十朔遽陞正郎臣問諸該曹上荅云聞其能舉職且陞授本曹正郎與他遷官者不同故如是擬望云此亦不然蔭官郎僚已爲極選豈可以數朔勤仕之故遽陞五品爲正郎乎



孝宗四年知中樞閔馨男䟽請慎簡知申憲長久任勿改

領中樞李敬輿劄曰六卿之長分摠庶官庶司之官各代天工而朝  
除暮遷如舍逆旅庶績之熙其可望乎臣愚以爲精擇六官各擇其  
屬如唐臺省之例久任責成庶司之官亦勿數遷以責成效則或有  
少補矣皐陶之士稷之農契之司徒畢公之司馬或死其官或經四  
世如張釋之之廷尉夏侯嬰之太僕兩漢之來猶存此道可見古人  
任官之意也 祖宗朝久任官吏而輪回吏胥故官執其柄今日則  
數遞官吏而元定吏胥故吏奪其權客主久近之勢固使然也

朴世采曰不擇人而爲久任猶之去一弊所益不多何處付得公  
正不偏黨大臣銓衡上自公卿下至各司擇人而久任之雖或得

行此法其不被擇者厥數不億必當與之合謀沮敗而後已久則必當假此法而行其私意天下國家之所以常亂者正由於此

肅宗三十三年領議政崔錫鼎疏曰久任一事宜自秋曹京兆掌隸諸衙門始堂上多官雖不得全數久任曹務裁斷專在長官刑判京尹判決以二十朔爲限秋曹郎曾限一周宜與京兆隸院諸郎并皆定以二周雖值大政一二員最久者外勿爲輕遷如有罷軟不堪者堂上啓遞擇差其以廉謹善職著稱者銓曹另叙右職以獎其勤此外各司郎屬各一員依古制令上官另擇通擬皆定二十朔戶曹郎及兵曹軍色限二十朔以防吏胥奸蠹以習官曹文書及事務諸久任人員并令啓下勿爲遷動此皆法典所載而稍減其朔數矣所謂

藩臬量宜兼牧云者海西則已令兼牧下批湖西曾已兼牧八九年而還罷識者恨之宜令道臣按其前日兼牧時規例更加叅量狀聞後稟處盖官長久任則上下相安莫有苟且之意雖有長才異能朝夕而去則不如中才之久且便也惟凡今政令無統奸弊日滋皆官司數遞之害也

正祖卽位初右議政鄭存謙啓守令之慎擇久任法意有在至於邊門尤有別焉而一自作爲履歷窠之後如六鎮三甲及江邊諸邑四道九鎮皆作邊地必湏經此然後始爲防禦使仍作闡帥階梯故赴任未幾輒皆圖遞坐席未煖遞易頻數徒貽邊民迎送之弊何可責其成績也哉粵自戊寅故相臣俞拓基爲慮此弊以邊地守令邊將之瓜限前徑



遞者勿論貶遞病遞并勿施履歷之意筵稟定式而其後未免因循瓜前徑遞又復如前臣於己丑待罪籌堂時以申明遵守之意陳達蒙允矣今則歲月寢久漸不遵行雖以臣耳目之所睹記言之絕未見其邊守之準限者此後則一依戊寅定式邊地守令及僉使之限前圖遞者邊地履歷勿爲施行之意更爲出舉條申飭何如 上從之

四年大司諫徐有防所啓量才授職用人之要道委任責成爲國之良法雖在上古盛時群賢布列而后稷播穀伯夷掌禮契教冑夔典樂一人而任其職九載而考其績可知其專且久矣而在官增秩漢制所以得人吏病迎送晉政所以乖當其治忽得失不啻若黑白之易卞而及夫世級寢降官制不古數遞之弊久以成規郎署之周流

殆遍州牧之陞遷無常官如逆旅吏作主人如是而尙何望百工允  
釐庶績其凝乎請戒飭廟堂銓曹之臣深軫器使之方申明久任之  
法俾有成效焉 上從之

增補文獻備考卷之一百九十七

弘文館 纂輯 校正

選舉考 十四

贈職

補新羅訥祇王二年贈歆良州干朴堤上大阿滄

詳見禮考

補眞平王二十四年贈小將貴山奈麻箒項大舍

詳見禮考

補四十六年百濟侵新羅新羅戰不利城主訥催謂士卒曰陽春和氣草木皆華至於歲寒松栢後凋今孤城無援日益阡危此誠志士盡節揚名之秋遂力戰死之王贈級滄

補善德主十一年百濟侵新羅陷大耶城舍知竹竹曰吾父名我以竹



竹者使我歲寒不凋可折而不可屈豈畏死而生降乎遂與舍知龍石力戰而死王贈竹竹綴淦龍石大奈麻

補真德主二年金春秋使唐還遇高勾麗邏兵從者溫君解以高冠大衣坐於船上邏兵以爲春秋殺之春秋得免主贈君解大阿淦

補太宗王二年王以金歆運爲郎幢大監伐百濟兵敗或曰今賊起暗中雖死人無識者歆運曰大丈夫旣以身許國何計人之知不知而易心乎揮劒突陣而死於是大監穢破小監狄得亦相與戰死步騎幢主實用那聞歆運死曰彼骨貴勢榮猶不愛生况予生而無益死亦何損乃赴敵死王聞之傷悼贈歆運穢破一吉淦實用那狄得大奈麻

補七年王遣金庚信等與唐將蘇定方伐百濟四戰不利士卒力竭將

軍金歆春謂其子盤屈曰爲臣當盡忠爲子當盡孝見危致命忠孝兩全盤屈曰謹聞命矣乃入陣力戰而死左將軍品日之子官昌年十六以副將再入敵陣死之敵以首繫馬鞍送之品日執其首袖拭血曰吾兒面目如生能死於王事幸矣王贈盤屈官昌級飭

補是年高勾麗侵新羅七重城縣令匹夫令軍中曰忠臣義士死且不屈城之存亡在此一戰悉力拒戰矢集其身如蝟而死王聞之哀哭贈級飭

補文武王十五年阿達城主素那與靺鞨戰亡王流涕曰素那父子世

濟忠義贈匣飭

詳見禮考

補神文王四年贈奈麻聚福子夫果驤徒逼實等三人沙飭又褒贈步

騎監金令胤有加

詳見禮考

補孝昭王三年金仁問卒于唐王追贈太角干

補文聖王十九年侍中金陽卒追贈舒發翰

補高勾麗東川王二十年魏母丘儉來侵屠王城主窘迫不知所之東

部紐由入魏軍詐降刺殺魏將王頎而死魏遂退軍王復國贈紐由九

使者

補高麗成宗七年教文武常叅以上父母妻封爵

麗朝推恩封贈始此

顯宗五年教歷代功臣封贈官爵

補六年贈艾田戰亡臣都巡檢使楊規工部尙書龜州別將金叔興將

軍御史中丞盧頤禮賓卿



補七年贈通州戰亡臣大將軍鄭神勇右僕射別將周演將軍散員任億中郎將校尉楊春郎將大醫丞孫簡尙藥奉御太史丞康承穎太史令

補十年贈新羅侍郎崔致遠內史令以太祖潛邸時貽書有鷄林黃葉鵠嶺青松之語謂密贊祖業也

補贈通州都府署庾伯符衛尉少卿同時戰亡人一百七十三人贈官有差

補十三年贈新羅翰林薛聰弘儒侯

補靖宗六年特贈李周佐右僕射

補文宗六年制曰韓彧文贊牛奇理金悅等於聖考南巡扈從有功并

追贈左右衛上將軍河拱辰臨賊忘身能却大兵追贈尙書工部郎中  
補八年有司請追贈太祖功臣大匡千明等三千二百人次第職從之  
補二十一年制曰故門下侍中崔沆姜邯贊叅知政事金猛清節直道  
歷輔累朝功在方策今四方樂康民受其賜皆諸公之力也可贈沆邯  
贊守太師兼中書令猛太子太師門下侍中

補三十四年制曰故門下侍中王寵之禮部尙書中樞使鄭倍傑皆忠  
謇不群才猷出類去世雖遠吾豈忘哉宜錫殊恩以昭寡人思賢之意  
可贈寵之守太師中書令倍傑守太尉門下侍中光儒侯

睿宗三年命配享功臣各加追封

補同年兵馬判官庾翼將軍宋忠與女眞戰於吉州死之贈翼兵部侍

郎知御史臺事忠上將軍兵部尙書

補仁宗初知御史臺事李永爲李資謙所忤謫死珍島及資謙敗贈簽書樞密院事

補五年贈左僕射洪灌守太尉門下侍郎平章事以其丙午殉節于拓俊京之亂也

補毅宗三年判三子赴戰有功者父母依三子登科例封贈賜米

補明宗二十四年平章事杜景升等請追加祖代諸功臣爵命以示不忘從之

忠宣王卽位教太祖代衛社功臣及却退丹兵人等三品以上員除父母之封以祖曾祖請封爵者許之



恭愍王

原本係忠宣王今釐改

二十年戰亡將士悉加追贈

補贈故正言李存吾大司成

補二十三年王以禍爲韓氏出追贈其三世及外祖官

補辛禍十一年憲府上䟽曰判事孫用珍奉使于明帝疑我國事鞠之用珍爲國忘身至死不服忠義可賞請贈爵諡以示後人從之

恭讓王二年趙浚上言士大夫追贈祖考三代父准子職祖曾祖遞降妣并同三品贈二代四品至六品考妣并同吏曹受判給牒從之

補三年中郎將房士良上書曰勲烈之臣萬世社稷之柱石也自今凡功在王室忠在社稷不幸而陷刑戮致殞命者如安祐李芳實金得培朴尙衷等追加褒贈以慰貞魂王深納之

補本朝權近所撰前朝侍中柳濯碑曰公沒越二十七年丁丑冬我太祖夢濯祈爵子濕覺而異之贈特進輔國高興伯

太宗卽位權近上書曰自古有國家者必褒節義之士所以固萬世之綱常也惟我國家應運開國三聖相承文致太平而褒賞節義之典尙未舉行庸非闕歟前朝侍中鄭夢周光山君金若恒其節義可尙此二人者宜加封贈上皆從之命贈鄭夢周領議政府事金若恒贊成事

補贈左司議文益漸上柱國平章事富民侯以其取種木綿之功也

補上聞朴淳之死錄功贈判承樞府事

世宗十二年教曰吉再以寒士抗節不仕是人之所以所難也贈諫議大

夫

經國大典 追贈宗親及文武官實職二品以上追贈三代父母准己品祖父母曾祖父母各遞降一等亡妻從夫職大君妻父正一品王子君妻父從一品親功臣則雖職卑贈正二品一等功臣父贈純忠積德秉義補祚功臣二等純忠積德補祚功臣三等純忠補祚功臣并封君中宗元年命燕山時枉被刑戮者咸加褒贈

補十一年以趙光祖言朱溪副正深源贈君甲子被禍者也

補明宗朝特贈成守琛執義 宣祖朝筵臣李珥啓曰徐敬德成守琛一時并出學問之功敬德固深而德器之厚守琛爲優故論者互分優劣 先王朝贈守琛爲執義贈敬德爲佐郎近日加贈敬德右相而守



琛之贈則不加焉士類以爲歉臣意加贈爲當守琛頑廉懦立之功眞

可尙也 上曰旣已爲賢者則褒贈爲重矣爵之高下何關之有

後加贈左

議政

宣祖元年 敎曰金宏弼鄭汝昌趙光祖李彥迪等大有功於斯道賜

祭贈官贈金宏弼鄭汝昌右議政趙光祖李彥迪領議政

先是 上問李滉曰朝議欲追贈趙光祖何如滉曰今日衆論乃彰

善瘝惡之舉必褒贈光祖是非可明也

**補**特贈權撥左議政

**補**贈前朝掌令徐甄大司憲

**補**五年贈故徵士曹植大司諫後加贈領議政

八年贈故處士徐敬德右議政初李浚慶當明宗朝議贈戶曹佐郎

至是廷議請加贈上曰其工夫多有可疑處李珥曰敬德之學出於

橫渠深思遠詣多有自得之妙非文字言語之學也於是是有是命補時廷議

多有異同而相臣朴淳儒臣許睥皆其門人睥力主加贈之議超贈議政

補十年副提學柳希春卒以久侍經筵至誠啓沃特贈左贊成

補二十二年教曰故執義李敬中當逆魁盛有名稱知其爲無狀極

力排之不通清顯竟被論劾其先見之忠不下古人其追贈判書以褒

之臺臣言其太過命贈吏曹叅判

補二十三年贈故副學金絿故承旨韓忠吏曹叅判故大諫奇大升吏

曹判書以絿大升嘗撰下宗系奏文得請忠嘗以書狀赴京奏請蒙俞

故也緣忠後并加贈吏曹判書

二十五年贈高敬命禮曹判書趙憲吏曹叅判

後加贈命左贊成憲領議政

**補**

又贈東萊府使宋象賢吏曹叅判釜山僉使鄭撥兵曹叅判元豪兵曹

判書

後象賢撥并加贈左贊成豪左議政

二十六年特贈金千鎰崔慶會左贊成同時死節人贈職有差

千鎰後領

議政

三十年贈咸陽郡守趙宗道吏曹判書安陰縣監郭趁兵曹叅判趁子

履常履厚工曹正郎皆守黃石山城殉節人也

趁後加贈禮曹判書

三十一年贈李舜臣右議政

**補**後加贈左議政

**補**光海十一年贈宣川郡守金應河兵曹判書應河以左營將從元帥



增補文獻備考 卷一百九十一  
姜弘立等赴援深河弘立等舉兵降應河力戰死之明朝詔贈遼東伯  
本朝亦加贈領議政

補李滉曰中朝隨其子職品封贈其父官甚是美制我國則不然  
子雖貴爲通政清顯之職不得爲二品之官則其父無官者不免  
爲士人爲子之心豈得安乎

補李暉光曰中朝官制五品以上爲大夫故得推恩三世我國惟  
從二品以上實職者得贈先代至 宣祖大王初年大臣建議朝  
臣之追贈者許推恩所後父母而不得并贈其所生父母遂爲成  
例蓋出於重宗統之意云

補仁祖元年特贈故叅判金權左贊成權以壬辰扈從分朝功錄勳封

清風君戊午以收議立異遠竄而卒至是盡削廢朝僞勳而特有是贈  
補特贈故持平尹根都承旨根在昏朝時論爾瞻續男罪遠竄而卒至  
是特有是贈

補特贈故牧使曹好益吏曹叅判門人朴暉等上疏請褒贈筵臣鄭經  
世備陳好益經學忠勳宜從其請以慰士子之望遂有是贈

補特贈儒生鄭澤雷持平

詳見學  
校考

補特贈故大司憲鄭述吏曹判書

補特贈故司宰正成運左承旨

補二年贈左防禦使李重老左議政右防禦使李聖符贈兵曹判書昌  
城府使朴永緒豐川府使朴榮臣伊川府使李師朱瓮津縣監尹廷俊

贈兵曹叅判都監哨官權浩源張緬贈兵曹叅議皆適變時戰亡人也  
補三年 上聞左叅贊鄭曄之卒卽其日命直拜贊成吏曹以非格例  
持之更命贈右議政

補五年贈平安兵使南以興左議政安州牧使金浚左贊成復讐將金  
良彥判中樞皆同年兩西戰亡將士也

八年命行伍戰亡者贈官

補九年特贈故叅判李命俊左贊成以清直敢言也

補十一年特贈延平府院君李貴領議政貴以元勳法當例贈而 上  
聞卒逝驚悼 下教曰業欲登庸而未及卽眞卽爲地贈以示生前必  
欲大拜之意



補南鶴鳴曰 仁祖朝諸臣力爭追崇之不可 上曰諸臣何以

并生親推恩乎自是遂停生親之贈

補特贈故判書鄭經世左贊成

補十四年用議者言特贈故叅判金長生吏曹判書

後加贈  
領議政

補特贈故承旨朴知誠吏曹叅判

後加贈吏  
曹判書

補十五年贈平安監司洪命耆吏曹判書公州營將崔震立兵曹判書

前判書李尙吉左議政前都正沈覲前正李時稷吏曹判書其餘勤王

戰亡人江都殉節人贈爵并有差

補從二品以上之推恩贈三世國典也判書鄭廣成生時子太和已

爲議政臨卒遺言曰吾爵亦高不必推恩盖所以贈加者爲其職卑

也六卿而加贈亦近於浮文也

**補**孝宗朝用筵臣趙復陽言特贈故叅議安邦俊吏曹叅判

**補**十年筵臣李厚源啓金德誠鄭弘翼等既以立節昏朝皆蒙贈諡之典而其時趙漫之疏最爲勁直士林至今傳誦而尙無褒錄恐有歉於培植節義之道命贈左承旨翌年相臣沈之源啓趙漫以布衣抗疏至被刑訊何異於仗節死義請加贈憲職命加贈大司憲

命贈金尙容

元本作金尙  
憲今釐改

領議政鄭蘊判書

**補**後加贈  
領議政

**補**顯宗朝因同鄉士子上章陳請特贈故掌令趙克善吏曹叅議

**補**六年命贈故忠臣安弘國左贊成壬辰亂弘國以寶城郡守爲李舜臣中軍戰亡于安骨浦忠義大節與舜臣并稱至是因其子宗述上疏

陳狀有是命

補九年命贈故掌令趙涑吏曹叅判靖社時涑力辭錄勳清白廉潔爲一世所服至是因趙復陽所建白有是命

補命贈故校理金麟厚吏曹判書故佐郎姜沆都承旨故忠勇將軍金

德齡叅議

德齡後加贈  
兵曹判書

補命贈故及第韓五相說書五相登增廣文科未殿試遭喪以歿筵臣

以爲言特贈文職

後遂  
爲例

補十三年贈故正郎李義健司憲府執義義健孝友端粹能詩能書與成渾李珥相友善萬曆中大臣李恒福白其行誼請擢用超拜工曹正郎至是永平多士疏請故有是命



補特贈叅贊宋浚吉領議政

補肅宗六年追贈芳蕃撫安大君芳碩宜安大君領春秋金壽恒啓以芳蕃芳碩等 神德王后祔廟之後法當贈爵爲大君而至今闕焉誠爲欠典 上下詢于入侍諸臣皆以當贈從之

八年以江都死節人宋時榮與李時稷節義無別命一體褒贈從金壽恒言也

十二年命特贈李植領議政植在 仁祖朝以大提學改修 宣廟實錄至是相臣金壽恒以其殫心纂述之功有非一時勞動之比筵請追褒遂有是命

補十六年判尹俞夏益啓曰中人常漢輩之贈爵或以工曹漢城府掌

隸院等職者頗多貴賤名分生死無別豈可以生前不相當之官遽加於死後哉雖不能一一追改今後只贈西樞之意定式施行爲宜命申飭該曹

補特贈判書姜栢年領議政以清白吏也

二十年命贈吳斗寅議政朴泰輔正卿 教曰兩臣忠節可比於孔道

輔補泰輔後加贈領議政

二十五年命贈金時習執義補後加贈吏曹判書

補海昌尉吳泰周上疏曰先臣斗寅秩正卿而所後祖翺前以他事

受贈乞依唐朝崔植故事推恩於本生祖翺 上特許之贈吏曹判

書

三十一年命贈洪翼漢吳達濟尹集領議政

孝宗朝初贈堂上職後加贈更判至是又加贈領議

政

三十九年命京外忠臣孝子旌贈有差

凡四百餘人

補吏曹叅判李晚成啓曰醫譯中庶輩贈職亦多以叅判兼摠府贈之事甚猥越只贈以同中樞或左右尹似宜備堂趙泰采以爲左右尹亦不當只許以同知似好 上曰頃見醫官朴星瑞以叅判摠府爲贈心亦以爲怪也加設同知之類不當以左右尹贈職也晚成仍請改授星瑞贈職

四十年

補作四十四年

復愍懷嬪爵號仍命姜碩期金弘郁贈官

英祖四年特贈戊申殉節人忠清兵使李鳳祥左贊成清州營將南延



年兵曹判書裨將洪霖戶曹叅判

補十三年特贈故處士許格吏曹叅議

二十一年己卯諸臣未贈職者并命贈職

續大典 大王私親之考贈領議政祖贈左贊成曾祖贈判書大院君

私親之考贈右議政世子私親之父贈左贊成○王妃考贈領議政

以上

三代國舅  
推恩例贈

世子嬪考贈左議政大君妻父贈右議政王子妻父贈左贊

成○奉命出疆身沒異域者陞品贈職○除職奉承傳未除職前身死

者贈相當職○新及第未分館前身死者贈相當職

登科而殿試前  
身死者亦同

○

醫譯中庶贈職者勿許叅判摠管加設同知贈職者勿許左右尹

二十三年命特贈戊申殉節人居昌座首李述源大司憲述源初贈執

義至是 上教曰李述源以遐鄉一功曹能辦顏杲卿事遂命加贈

補校理吳彥儒啓贈職亦係名器施之宜得其當矣必其地閭名望當爲吏曹者乃贈吏曹卽是舊例而近來則混淆無別以兩班爲名者則輒贈吏曹甚至於兩班不分明者亦以吏曹爲贈不得則人皆耻之且雖中人常人輩若非刑工叅判叅議則亦不肯贈事之可駭莫此爲甚自朝家宜有區別定式隨其人地相當而贈職俾無屑越之弊宜矣上曰令該曹就議廟堂講定可也

補二十五年領議政金在魯所達向者儒臣吳彥儒以贈職猥濫事陳達於筵中自 上有該曹就議廟堂講定之教矣此事自 先朝逮于當宁累有申飭法非不嚴而拘於人情每不遵行此後則一依曾前定

式吏曹贈職必以應爲吏曹者爲之中庶贈職勿許爲工刑曹叅判叅議以正名器更加申飭於該曹俾無違越何如 令曰依爲之

二十七年因忠清監司洪啓禧狀啓宋翼弼徐起以道學懿範俱皆卓絕而爲一世之所推仰并特贈持平

二十八年加贈斥和諸臣官一級

二十九年命故徵士金昌翁依李之齒例特贈正二品

初贈執義至是加贈

三十四年特贈成三問朴彭年河緯地柳誠源李塏俞應孚正二品嚴

興道從二品

肅宗朝贈叅議至是加贈

補李宜顯曰侍從臣父年七十加資古無是例自 顯宗朝始有

之而只是官卑者推恩陞資而已今則資憲以上無不推恩不但



恩典之濫觴原其本意以子之貴延上於未達之親而今乃以其子之卑秩官高之父疊加崇級殊無意謂矣

○正祖十三年右議政金鍾秀筵啓贈職只加一階之法申明復舊且如儒生之以一行褒贈者只贈叅下官最著者贈以六品職其中尤卓異者稟旨後始許贈臺侍從之

○二十年贈大司憲申晏加贈正卿

○特贈故萬戶鄭運職兵判

○贈故知中樞柳琳職領議政

○二十二年命金沈金之純金之白贈職教旨以崇禎年號書之

○贈故崇禎處士蔡得沂職

續二十三年贈故牧使文緯世職以其壬辰倡義摧賊有是命

續六月申明特謚人加贈之式

續純祖二年命受贈之人非抄選南臺則毋得贈大司憲

續七年命壬辰戰亡人故僉使李英男故縣監馬應房馳贈之典

續特贈判敦寧朴準源職上相

續九年命曾經閣職人贈職許兼閣啣著爲式

續哲宗十年翰試被選人趙然斌身死領議政鄭元容啓言此是召試設行後初有之事例無可援然旣被選則與擬差之職有異而次第直爲付職者也令吏曹成給告身似合惻恤之典矣從之

續今 上六年正月命宗姓人受贈時親盡在六世內者贈吏曹宗正

卿隨品例兼

續命判宗正卿依輔國奉朝賀例三代贈職

續命承襲君階至上輔國而卒則例贈上相宗代未盡文蔭武當襲封者身死則雖在叅下官贈君卿

續七年八月命改正贈職條例

大王私親考王妃考贈上相世子嬪考贈左相世孫嬪考贈右相左相之父副僉尉之父并贈左相右相之父國舅輔國奉朝賀判敦寧判宗正卿之父并贈右相

續十月命世子嬪世孫嬪考及左右相考并以上相贈職

續光武四年定追贈規例



正一品曾經議政考議政

大匡之考大匡階  
輔國之考輔國階

祖叅政

從一品階

曾祖贊政

或各部大臣

正二品階

曾經輔國叅政依議政例追贈從一品曾經叅政

大臣大學士議長及卿考叅政

從一品階

祖贊政或各部大臣

正二品階

曾祖

叅贊或協辦

從二品階

正二品曾經大臣贊政副將館閣學士及卿考贊

政或各部大臣

正二品階

祖叅贊或協辦

從二品階

曾祖秘書丞

正三品階

從二品

曾經叅贊摠辦協辦卿詹事掌禮少卿叅將裁判長全權公使判尹

觀察使考叅贊或協辦

從二品階

祖秘書丞

正三品階

曾祖弘文侍讀或掌禮

從三品階

受贈人妻從夫職受贈人曾經館閣隨品兼贈贈職案自宮內

府奏下

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十七

增補文獻備考卷之一百九十八

弘文館 纂輯 校正

選舉考 十五

薦用 一

補新羅逸聖王十四年命各舉智勇堪爲將帥者

炤智王十九年命群臣舉才堪牧民者各一人

眞興王元年選童男容儀端正者號風月主求善士爲徒以礪孝悌忠信

三十七年置花郎初君臣患無以知人歌使類聚群遊觀其行義舉用之其徒日衆或道義相磨或歌樂相悅遊娛山水無遠不至歲月旣久



邪正自見擇其譽望多者用之

補惠恭王五年命群臣各舉所知

高勾麗太祖六十六年命有司舉賢良孝順

故國川王十三年聘處士乙巴素爲國相王曰近者官以寵授位非德  
進毒流百姓動我王家此寡人不明所致汝四部各舉賢良在下者於  
是共舉東都晏留言於王曰臣庸愚固不足以叅大政西鴨綠谷左  
勿村有乙巴素者性質剛毅智慮淵深不見用於世力田自給大王欲  
理國非此人不可王卑辭重禮以聘之拜中畏大夫加爵爲子台謂曰  
孤叨承先業處臣民之上德薄才短未濟於理先生藏用晦明窮處草  
澤者久矣今不我棄幡然而來非獨孤之喜幸社稷生民之福也何以

教寡人巴素對曰以臣之駑蹇不敢當命願大王選賢良授高官以成大業王知巴素薄其位乃除國相大臣宗戚皆疾之王曰苟不從國相者無貴賤皆族之巴素感其知遇明政教慎賞罰人民以安內外無事王以爲薦賢當受賞拜晏留大使者

金富軾曰古者哲王之於賢者立之無方用之不惑若殷高宗之傳說蜀先主之孔明秦苻堅之王猛然後賢在位能在職政教休明而國家可保今王決然獨斷拔巴素於海濱不撓衆口置之百官之上而又賞其舉者可謂得先王之法矣

補西川王十一年肅慎來侵王謂群臣曰寡人謬襲邦基德不能綏威不能震致此隣敵猾我疆域思得謀臣猛將以折其衝爾群臣各舉有

奇謀異略才堪將帥者群臣皆曰王弟達賈勇而有智畧堪爲大將於是遣達賈伐之掩擊大破之封達賈爲安國君

補烽上王五年慕容廆侵王患之國相倉助利曰北部大兄高奴子賢且勇大王必欲禦寇安民非奴子無可者王以奴子爲新城太守奴子善政有威聲慕容廆不復侵

高麗太祖元年詔曰設官分職任能之道斯存利俗安民選賢之務是急誠無官曠何有政荒朕叨膺景命顯馭丕圖顧臨蒞以難安念庸虛之可懼惟慮知人不明審官多失俾起遺賢之歎深乖得士之宜寢興載懷職此而已內外庶僚并稱其職則匪獨今時之致理足貽後代之可稱宜其登庸列辟歷試群公勉務精選咸使僉諧自中及外具悉朕



懷

補時崔凝以內奉卿轉廣評侍郎凝辭曰同僚尹逢長於臣十五年請先授之王曰能以禮讓爲國乎何有昔有其語今見其人遂以逢爲廣評侍郎

成宗六年教曰噫懷材抱器事君王忠也立身揚名顯父母孝也忠孝可稱寵榮何慙若有螢窓勵志鱣肆明經孝悌有聞牧宰州縣具錄薦貢

補命於十二牧置經學醫學博士敦行教諭長吏百姓有兒可教者具

錄薦貢以爲恒式

詳見學  
校考

十一年教曰殷宗之於傅巖徵用胥靡周王之於渭水登庸魚師或任

之耳目或授以台衡故能匡扶社稷經濟邦家朕自揔萬機思齊七政非積學無以知善非任賢無以成功猶未致懷寶出衆之士安知無蔽賢妨能之人凡文才武略者聽詣闕自舉

敕曰王者旁求多士爰備百僚以才俊爲先京官五品以上各舉一人所舉者德行才能具疏名下以奏

十四年敕曰予恐業文之士纔得科名各牽公務以廢素業其年五十以下未經知制誥者翰林院出題令每月進詩三篇賦一篇在外文官自爲詩三十篇賦一篇歲抄附計吏以進翰林院品題以聞

十六年命有司奇才異能隱滯邱園者搜訪以聞

穆宗六年令三京十道博士師長獎勵生徒有勤學者錄名以聞管內

有才學者逐年薦舉勿墜恒規

九年王患州縣乏人詔文班常叅以上各舉才堪治民者一人視所舉當否以賞罰之

補顯宗九年御宣化門集三衛鷹揚軍功臣子孫及文班六品以下有武藝者試定科等

補宣宗三年詔文武常叅三品以上各舉忠直清廉有才德者各一人睿宗元年詔曰蓋進賢退不肖爲政之要也然百職至煩非朕所能盡知如有賢良在下宰相薦之

十三年以金尙碑判閣門事李惟寅爲大府卿二人清直自守故年高未達同知樞密院事韓安仁上劄請加擢用以勵具臣故有是命



仁宗五年詔侍從官各舉一人所舉無狀則罪之

八年詔侍從官各舉遺逸一人

十一年

補作十年

詔曰有清白奉公節義殊異者宜各褒舉以聞

**補**毅宗五年鄭襲明卒王欲得有名望者代之宦者鄭誠薦金存中擢拜右承宣

**補**十六年平章事崔允儀疾革王遣人問所欲言奏曰爲國大用者惟崔均耳王卽授閣門祇候

二十二年詔曰近世薦舉路絕賢不肖混淆其文可以華國者兩府宰樞臺省侍臣諸司知制誥及留守官各上書奏薦

**補**明宗二十七年宰相趙永仁任濡崔詵崔讜等聯名劄薦李奎報

可補外製以備將來文翰之任遂蒙允可掌奏承宣以私憾奪筍子不付天曹佯稱忽失冢宰亦以筍子不付爲辭便不調用奎報寄詩冢宰趙永仁其引曰伏蒙省樞諸相國同上筍子薦達鯁生制書已降中路遽移此何異放生之魚反入圍人之鼎將獻之鵠忽亡使者之寵是朝野所共歎也其詩曰昔見銀杯嘗羽化今聞筍子忽登仙一時傳誦

補高宗四十五年承宣柳璈薦許拱崔寧元公植并屬內侍爲政事點筆員時號政房三傑

補崔怡專政嘗題品朝士以能文能吏爲第一文而不能吏爲次吏而不能文又次之文吏俱不能爲下皆手疏屏風考閱而叙之

補元宗四年平章事李藏用知門下省事柳璩上書薦吏部侍郎金垢

拜右諫議大夫

詳見  
銓注

補忠烈王二十六年贊成事安裕薦密直副使李愐典法判書李璵爲  
經史教都監使

忠宣王初教曰用人不可專用世家子弟其有茂才碩德孝廉方正之  
士退居巖谷者所在官薦達貧不能行者官給衣糧敦遣

忠肅王十二年教茂才碩德孝廉方正之士側微無聞者所在官司錄  
名升薦

補忠穆王卽位御書筵安震言臣備員兩府未可竟日侍講宜擇端士  
以備顧問遂薦春秋修撰元松壽藝文檢閱許湜



補李齊賢以老乞免書筵舉贊成事安軸密直副使李穀以自代其  
賤曰竊見安某李某學問高於東方才名動於上國擇於二俊替此  
一愚重席談經彼得贊右文之化閉門謝事臣何忘優老之恩

恭愍王元年教曰山林鄉曲如有經明行修茂才苦節之士按廉使以  
聞典理軍簿隨才擢用

補典禮判書白文寶上書曰若指瑕掩善則人無可用隨器任用則  
士無可棄使在位達官各舉所知則克協至公野無遺賢乞依司馬  
光所議設十科以舉士一行義純固可爲師表二經術該博可備考  
問三方正識大體可爲臺諫四文章典麗可備製述五獄訟法令盡  
公得失六廉義理財賦公私俱便七公正有風力可寄方面八愛民

勵節可作守令九智勇才略防禦將帥十行止合度可爲典禮應職  
事官自兩府諸奉翊至從三品以上侍從官自僉議監察提學外製  
六品以上每歲舉堪當一科者一人有堪舉者不必拘於一科舉非  
其以致敗與舉主俱免

三年教曰沿海守令職兼防禦誠難其人自奉翊以下代言以上各舉  
清白有武才者二人

五年教曰懷才抱道肥遯不仕者所在官錄其德行敦遣赴朝命宰相  
選廉公諳吏治者爲守令

十年命宰相百官各薦賢良二人

**補**知奏事元松壽典機務八年嘗懷憂懼涕泣乞代王曰卿進如

卿者可代乃舉李岡自代

十一年令省郎薦六品以上可外任者

臺諫金續命上書曰田里休戚在於守令雖有臺諫政曹保舉之命皆徇面情所薦至有不識字者願自今臨軒引見核其名實舉非其人舉主必罰

十二年教曰今後僉議監察及六曹五品以上各舉所知以備擢用所舉非人罪及舉主

辛禡元年令宰相及六曹臺省各舉才兼文武可爲守令者

十四年令宗臣耆老臺省六曹舉文武賢良

補辛昌元年侍中李穡乞退舉李琳



增補文獻備考 卷一百九十八

令臺諫六曹舉堪爲守令者又復以士人爲縣令監務

恭讓王二年令百官各舉賢良二人

補三道鹽鐵漕轉使王康舉前牧使呂稱爲副使將以代已任

本朝 太祖元年命兩府六曹臺諫各舉賢良遺逸二年以安省禹玄

寶選清白吏

補定宗元年命六品以上各舉賢良

上問知申事朴錫命誰能代君任錫命曰承樞都事黃喜眞可人也

上遂用之

太宗元年以慶儀李之直金若恒李伯持朴瑞生李原崔有慶崔士儀

選清白吏

補此是累次所選

六年 上曰大臣以可爲政府六曹者職秩雖卑可爲將帥者可爲臺諫者具名以聞予其用之

補叅贊權近上書曰前教授金泮精敏前監務金從理篤實皆好學問孜孜無倦或任世務皆可克堪望下吏曹量宜注授以旌其勤以勸于後

補十五年左議政朴訔掌銓選啓曰儒者率憚教授之任而尙州儒學教授魚變甲以壯元及第不憚就職勤於訓誨宜速褒獎何待秩滿乃授獻納

世宗五年 教曰令文武官各舉勇智過人可守邊塞者公正聰明可任守令者諳鍊詳明可處煩劇者

八年命大提學卞季良選年少文學之士賜暇讀書湖堂季良選權採南秀文辛碩祖

二十年 教曰我國以科舉取士而無德行選舉之法如有士行卓然素聞於鄉者才藝特異見信於人者諸道觀察使搜訪以聞

二十二年以黃喜金淡

柳琰作

柳寬孟思誠柳謙李碩根閔不貪洪桂芳

李知朴彭年李廷輔補崔萬理鄭陟黃孝源選清白吏

補任元濬嘗以儒生坐事謫密陽觀察使歎其聰明才藝歸朝奏之上即命以白衣叅集賢殿

補命舉經明行修堪爲師儒者朝廷以金叔滋趙注爲首薦並除成均

注簿



補結城邑誌 世宗朝 上爲未出閣諸王子預養擇師命集賢殿

慎簡其人以生員金大來薦聞又詢于承政院咸曰可於是以教官  
召之爲其離違從官有妨愛日之情以駟迎母入京一時榮之

三十年領議政黃喜乞退薦金宗瑞自代

文宗卽位手製 教書下議政府曰若其志氣高邁有國士之風者節  
操敦確敢言直諫者勇敢剛力能禦外侮者不畏強禦莅官如家者通  
達事理處事明敏者是皆可大用之人也且用人之仁當去其貪用人  
之勇當去其怒用人之知當去其詐至於跡弛之士但有一藝亦可器  
而用之今雖使政府銓曹薦舉賢才貶黜不肖予猶以爲未廣自東班  
六品以上西班牙四品以上各舉賢能可進用者

補端宗元年 上召大臣皇甫仁金宗瑞鄭某等問可爲大司憲者誰  
歟宗瑞等對曰宜用思慮深長不喜紛擾者朴仲林其人也 上曰然  
遂以仲林爲大司憲仲林彭年之父也

補二年諭諸道觀察使曰行己者以孝悌節義爲重居官者以恬靜惻  
悌爲重國家自 祖宗朝教化涵育風俗歸厚官吏稱職求而用之蓋  
多其人焉第在上者不能甄別而旌異之爾卿旣專一方黜陟之權宜  
擇孝子順孫義夫節婦之特異者守令之公廉正直顯有功績者俱錄  
予當擢用而獎焉

補世祖元年 教鄭麟趾等曰進賢退不肖相之職也卿其得賢良如  
申叔舟者薦之

補三年命議政府舉文武堪爲將帥者三人

補七年 上慮文學之士漸不如古命都承旨洪應擇文士有學術者以啓應判內資寺事李坡等二十三人以啓遂命坡等兼藝文館職每朔望朝會時親講經書又月再賦詩

補諭諸道觀察使曰山林村野隱伏沈滯素有聞望不能自售者其令界首官薦舉

九年

補作八年

教曰予常安不忘危思得將才凡大小臣僚皆與我共治者

勿拘卑顯勿嫌親姻具錄才行實封以聞 上搜羅俊異士有小善一

藝率皆甄錄往往擢以不次

以盧叔全鄭文炯朴薑李堰郭安邦補金從舜奇虔選清白吏



上命宰相選經明行修者置師儒金宗直爲首薦卽除成均注簿兼世子右正字 上慮遷秩無常人或有僥倖之望而其賢能才行者則不

次擢拔

十一 上曰將帥須用文臣予欲得其年少者培養卿等各舉所知

遂薦年少文臣之可用者三十餘人命以侍講院說書洪貴達藝文

待教李瓊全刑曹佐郎河叔山爲宣傳官

文兼宣傳官始此

睿宗元年 上慮有懷才抱德晦跡山林不能自達者下諭諸道觀察使搜訪敦遣於是稍有藝能者莫不見用

成宗元年 教曰爲政莫急於得人宗親文武六品以上各舉賢能務

從其實予當擇而用之

教曰今有衣冠子弟不學無才而列於庶位者多其悉汰生員進士通經史識時務可堪任用者舉而用之

補貞熹大妃 傳教曰予族親庸劣之輩曠官尸錄者多今此星變恐由於此惶恐實深賢俊之士退藏山林者宜搜訪招來

補五年諭諸道觀察使曰自古願治之主以求賢爲急予即位以來搜訪遺逸登庸非一尙慮文武之才未盡見用卿悉咨訪雖一才一藝詳錄以聞

十三年 教曰國家設科取士又立薦舉之法欲其才德之士咸使登庸求賢之路不爲不廣然滄海遺珠自古所歎草澤巖穴之間豈無懷才抱奇沉鬱而不能自售者乎凡厥在位搜訪遺逸咸以名聞

經國大典 京外東西班三品以上每三年春孟月各薦三人

三品至無職

每年春孟月東班三品以上西班二品以上各薦堪爲守令萬戶者并無過三人若犯贓污敗常之罪則并坐舉主每年春孟月議政府六曹上官及司憲府司諫院官員各薦堪爲觀察使節度使者忠勳府薦功臣子孫才堪吏任者○凡薦舉者曾經試才及已行六品以上顯官外四書中一書三經中一經從自願試取

補十四年侍講官李坡奏曰今之典文徐居正李承召已老矣無可繼其後塵者如經學則李世佑金應箕史學則丁壽崑趙之瑞詩則曹偉申從濩宜循其才分培植儲養 上命禮曹與主文大臣議啓

補十四年孫舜孝薦前察訪李寬義經明召至侍講稱旨 上欲擢用



寬義固辭以老乃許還令所在官賜米豆

補十八年 上御夕講侍讀官鄭誠謹奏曰用人當委銓曹注擬故許琮爲吏曹判書人皆服其用人之當而今吏兵禮曹郎承政院注書等自薦其僚臣恐不革此弊政出多門終至於朋黨也 上以爲然

二十一年叅議尹兢疏薦鄭汝昌孝行學識內瞻正趙孝同又書陳其行誼 上書其尾曰觀汝昌之行不覺出涕雖古人何讓須速擢用以示國家旌善之意仍授昭格署叅奉

翰林金駟孫薦鄭汝昌爲檢閱

舊例翰林新薦時末薦之爲下番者與諸僚一會相議新薦而下番實主之閉戶密議以定薦次薦完則回薦于曾經翰林及兩館堂上

無異議然後焚香告于皇天后土其辭曰秉筆之任國家最重薦非其人必有其殃乃與三公及政府東西壁兩館銓曹堂上合坐使叅薦人試講綱目左傳宋鑑等書以定高下

閱鎮遠翰苑題名錄識曰史局國之所重而新薦又是史局之所重也千萬世是非之權付之史官之手自古名臣碩輔之居是職者於新薦一事必加謹慎審擇焉故金駟孫在下番五年必得先正臣鄭汝昌而後始行新薦云耳

臣謹按國朝翰林始自黃喜金問而成廟以前則薦規無所考不得載錄焉

教曰天生一世之才足供一世之用但賢者無自售之理正賴卿大夫

相與薦拔而登進不然則瑰偉奇特之士無異常調皓首而郎潛者有之耄老而執戟者有之以至韜光鏌彩遠居巖穴不求聞達使朝廷有乏人之歎此豈非廊廟之責耶其各舉所知以副予側席之意

諭議政府曰咨爾在廷三品以上及侍從臺諫與在外監司都事節度使二品以上及守令等務廣乃心勿拘親故如得宏才碩德之士悉用推舉予不以常調待之且人無求備前聖之謨如有一才一行者亦具以聞

**補**又 教曰賢者處世固非一端或隱於巖穴或混於屠沽或仕於管庫或安於抱關雖非全德之人苟有一節之可觀斯爲善人并以名聞以副予側席明揚之意



以林整成倪許琛朴說尹碩輔具致寬李塤李賢輔金謙光安彭命梁  
灌朴處倫趙之瑞閔暉李慎孝選清白吏

補二十一年命政府六曹揀選武臣之有將才者以聞

補中宗二年命諸道搜訪遺逸如有卓異者隨才錄用居館儒生經明  
行修者亦舉用之

補三年 教曰聖帝明王代天理物曷嘗不求賢籲俊爲先務哉然  
而知人則哲自古其難故以堯舜之明尙咨四岳然後濟濟之賢咸列  
于朝予以不穀寅紹不圖覃精夢卜側席拊髀然其鏐彩邱園滯跡下  
僚者豈予一人所能周知必資明揚乃可顯擢其令政府六曹勳府樞  
府觀察使節度使漢城府承旨三司文臣五品以上各舉通訓以下及

儒生有才廉直者一二人署名緘封以啓其有循私謬舉者當繩之以法

補五年命太學薦儒生中通經史識治體者 教曰予偶覽輿地勝覽徐居正所製尊經閣記有云 上語左右曰今布列朝著皆綺紈子弟不學無術學生必有通經史識治體才堪任用者令本館薦舉又云每月朔望引館官儒生于內殿講論經義優加褒獎又云命宰相輪日仕本館會講經史訓誨諸生屢遣近臣賜酒此事豈非今日之可遵行者乎於是分遣史官五員于成均館及四學視儒生居齋之多寡時就學者八百餘人遂命太學薦其通經史識治體者

補六年 教曰予聞儒生多聚于學果愜所聞其可用者抄選以奏於

是成均館以趙光祖金錫弘黃澤三人應薦 上命銓曹調用

十年安瑔啓曰進士趙光祖明經術有行義爲成均首薦所當擢用若拘資格例調叅奉則不足以勸勵士林請除六品 上允之卽授司紙又啓曰明經有行義之儒不可但循資級請擢授不次獎勵士林遂拔當時聞望之士特除六品趙光祖金湜金大有朴薰是也又請擢用金安國金淨宋欽潘碩杵

補十一年 教曰論道經邦莫如文防戎禦敵莫如武故先王視文武如左右手其令政府六曹漢城府各薦文武有將才

補十二年 教吏曹曰求賢將以試用也薦以不用惡在其求之也右議政向薦金湜予欲先用於守令以試治民之術



補命薦草野存心有道者

十三年 教曰爲國之務人才最先薦舉之精惟在宰輔咨爾政府其體予意廣詢博訪以副側席之意

三公議啓曰我國用人之法惟科舉一路取句讀之士較一日之長故碩德宏儒終老蓬蒿而不求聞達若搜訪遺逸布列朝端卽三代之美政然先王之典章不可輕改也不如薦而試之遵漢世之良法也趙光祖亦曰以 殿下之求治未見成效者實由不得人才故也若行此法不患不得也

命弘文館四館六曹八道各薦有學行堪爲百執事者摠八十餘人署經兩司報議政府

相臣成希顏宋軼卜相以金應箕鄭光弼申用漑三人書啓希顏啓曰  
三人中光弼則自少沈重喜怒不形倚望甚重光弼當先用也金應箕  
爲人雅重若國家大事則非光弼不能爲也申用漑有才人也然豈以  
十用漑而易一光弼乎今日 上至誠卜相不可不以實啓

令政府薦人才三公鄭光弼申用漑安瑒薦金克成等八人

趙光祖曰擇士當於入仕之初擇之旣用之後則吁亦晚矣庶僚  
雖多而無可用之才者不擇於入仕之初故也審取捨辨賢否則  
士習自趨於正矣

補慶尙道觀察使金安國薦本道行誼才學之士盧瑋金顥等三十餘  
人多金宗直金宏弼之門徒也士林聳動

補十三年 上聞掌銓之臣以百執事無可用之人爲憂謂筵臣曰大臣平日多薦藝能則豈有乏人之歎乎叅贊官趙光祖曰國家用人雖以科舉爲重然有大賢則何必拘科舉哉今之朝士不肯見大臣者以干謁爲恥也大臣若誠心求之何患無才無好人三字非有道者之言也 上曰周公聖人也猶吐哺握髮急於求士况今之大臣乎

補十四年承旨韓忠啓以申潛金湜李延慶朴薰等學行超卓請並獎拔大用從之

補韓忠啓曰近日在讀書堂欲讀性理大全而難於辭說今之知理學者惟戶曹佐郎金湜而已臣欲與同僚啓請金湜賜暇講讀而國法非文士無賜暇讀書之例故終不果金湜之學非但能通一方面



已陰陽理數文章無不通貫今若進講理學非此人其誰能之 上  
曰科第有如金湜者則用之當不次也戊寅冬拜掌令 上曰金湜  
已欲使之進講而臺諫之職亦重故未果耳湜之爲人予於經筵講  
論時知之矣副提學趙光祖進曰如湜之爲人不特文士中所無自  
是難得之人也

補二十七年 教政府曰廷臣有清節素著至老不變爲衆信服者啓  
之政府以趙元紀對 上歎賞良久超拜判義禁元紀之前後三命皆  
以清見褒世未嘗有之也

補三十六年朝廷方舉遺逸金安國將薦成守琛問于洪奉世曰朝  
廷欲求堪任百執事者耳成某則年垂五十不求聞達徵辟之下徒

使斯人難於進退而公亦難避近名之誚不如且已安國曰朝廷求賢雖未大用某待罪列卿當薦一時第一流使其姓名達于楓宸可也他何足屑遂薦守琛

以崔命昌權璜金斌曹致虞吳世翰宋欽韓亨元申公濟金陽震金詮姜叔突李喜良柳軒趙士秀選清白吏

**補**李暉光曰蘇世讓與申光漢鄭士龍同時而李荇於蘇世讓最所稱許屢言於上前曰蘇世讓當爲主文之人不可置在下伍自通政陞嘉善至資憲皆荇所請也世讓乞養授洪州牧使赴任未數月荇又言文章之士不宜出外上即命召還前輩之喜獎人如此

仁宗即位令大臣薦逸士之懷才抱道者大臣難於其薦欲遵舊規  
上曰賢人君子雖重於出處而惟在人君求之誠不誠如何耳得而果  
賢則擢置宰相亦何難哉如或拘於舊例則求賢之路未廣野無遺賢  
之美今不可復見耶

教曰彰善罰惡爲政之所當先其有忠孝卓異者及爲吏清白者廣聞  
以啓隨才擢用

明宗元年政府禮曹同議抄啓清白吏朴守良金洵等又選清白吏尹  
釜鄭宗榮李世璋安珰金從舜補趙士秀洪暹李重慶

原本作朴守良  
金洵今從吏曹

錄所載  
釐改

補又命政府兵曹薦將帥才以張彥良李光軾梁允義張世豪應薦彥



良超資光軾以下令銓曹以次陞用

七年下諭八道舉遺逸成守琛李希顏曹植成悌元趙昱以操行卓異超叙六品授縣監

補京畿觀察使薦成守琛趙昱清洪道觀察使薦成悌元慶尙道觀察使薦曹植李希顏並以操行卓異直叙六品授縣監守琛受學於趙光祖恬靜養志不求聞達昱晟之弟才行高潔安貧慕古隱居龍門山悌元倜儻有大畧通明經術自己卯後放浪詩酒不事拘檢植剛毅直方以名節自勵少許可不苟取與希顏器量宏深才行卓異中宗朝屢除官不起時稱薦舉科後得人最盛云

補臣謹按所載雖如此而李希顏卒

於中廟  
乙未可疑

選廉謹吏李浚慶等四十人賜宴闕中

浚慶辭不赴

補廉謹被抄人戶判安玟右叅贊朴守良平安監司洪暹刑判趙士

秀大成李堇禮曹叅議李夢弼左承旨洪曇右承省成世章大諫尹

春年判校尹鉉左通禮尹釜掌令柳渾濟用正禹世謙司僕正朴永

俊司僕副正任輔臣校理鄭宗榮副校理朴民獻工曹正郎李增榮

司贍直長金夢佐等十九人叅宴大司憲李浚慶同知任虎臣周世

鵬同副承旨金鍾前大成李滉典翰宋贊部將許世麟軍器別坐安

濟行司勇金彭齡司宰正姜允權等十人病不叅宴外任被選人會

寧李榮江界金洵羅州吳祥尙州申潛密陽金雨溫陽李重慶醴泉

安從璵江陵金擴新溪俞彥謙金溝下勳男韓山金若默知禮盧禎

漆原辛士衡前郡守金龍文等十四人各賜表裡一襲

奇大升啓曰學行出衆之人曾被竄謫年今已老當汲汲收用擢以不次之位蓋指白仁傑盧守慎柳希春金鸞祥等也大臣亦以爲言於是皆蒙擢拔

八年尙震啓曰李滉持身清簡蕭然若寒士宜徵之趙士秀曰李滉可扶頽俗上手札召之

十三年李滉乞退上曰卿於朝臣無可薦者乎對曰今日在大臣之位者皆清慎六卿無邪匿之人至於首相李浚慶當危疑之際不動聲色而措國勢於泰山之安誠柱石之臣所當倚重者

補十五年命大臣與禮曹同議抄啓文章宰相尹春年等十三人製述



文臣李蘧等二十五人大臣等言宰相乃是成才之人不可使之試講  
試製當別有勸獎之道也 上曰然且德行本也文藝末也可令大提  
學鄭惟吉復選才德兼備者以聞

命招嘉善以上會圈以鄭惟吉爲典文衡

臣謹按國朝之有文衡自權近下季良始薦圈之規既無可攷  
至是始有嘉善以上會圈之事而 宣廟以後則議政及政府  
東西壁六曹長官會圈此卽近例也

十八年選湖堂李後白

李暉光曰書堂例以年未四十者選差而惟李後白李爾瞻俱四  
十而被選堂上後仍帶者朴民獻李德馨鄭百昌李明漢鄭惟吉

也


二十一年命舉經明行修之士朝廷以李恒成運朴薰金範韓修南彥  
經應命

命舉經明行修純正勤謹老成溫和六行俱備者令吏禮曹議大臣  
以啓吏禮曹遂以學生李恒前叅奉成運前別坐韓修前叅奉南彥經  
前叅奉林薰進士金範等六人應薦恒少業弓馬讀大學慨然求道潛  
心力行運守琛從弟也溫恭儒雅未嘗言人過失琴書自娛足跡不到  
官府彥經師事洪仁祐知名當世薰事親至孝以薦授叅奉棄歸於是  
命並超叙六品職乘駟詣京尋因吏曹判書閔箕言六行俱備改稱經  
明行修

補時議者以爲當令林下之賢無如曹植請並收召從之

補李濟臣曰 明廟晚年命擇經明行修之士所薦六人泰仁李恒報恩成運山陰林薰尙州金範京居韓修南彥經皆除六品職召對于思政殿問以治道其問目書之二紙一置御案一賜承召人使之隨問以對初 上命擇六條俱備人吏曹以名號太過只以經明行修改捧傳旨方諸人承召聚京之日 上命召三提學將欲試策若科舉之爲者政院啓曰以賢而召不必如此乃只引見論以言語而已觀其問目御札似是殿試策士題體也







舉選

庸文

三十九